

NÜXĨRAÜXŨ GA POPERA GA CORÍTIUCŨĂX GA JAXŌGÜXŨTANÜWA NAMUXŨ GA PAURU

**Pauru rü nüxũ narümoxê ga jema
jaxŏgüxũ ga Corítuarü ïanewa
jexmagüxũ**

1 ¹⁻²Pa Chaueneêgü i Corítuicũăxgüx, chama i Pauru rü namaã i taeneê i Chótene nixĩ i pexçax tanaxümatüxũ i nhaã popera. Rü Tupana nixĩ ga choxũ jaxucü na Ngechuchu ja Cristu choxũ imuxũ na duũxũgümaã nüxũ chixuxũçax i norü ore. Pa Chaueneêgü ja Tupanaärü Ixĩguxe, pema rü marü Tupanapexewa peixüüne jerü Ngechuchu ja Cristu marü pexũ nixüünexê. Rü Tupana rü marü pexũ nade na norü duũxũgü peixĩgüxũçax wüxigu namaã i guxũma i ngêma duũxũgü i guxũwama tórü Cori ja Ngechuchu ja Cristuxũ icuaxũgüxũ. Rü nüma ja Ngechuchu ja tórü Cori ixĩcũ, rü ngêma duũxũgüarü Cori ta nixĩ. ³Rü chanaxwaxe ja Tanatü ja Tupana rü tórü Cori ja Ngechuchu ja Cristu poraãcũ pexũ narüngüxêê rü pexũ nataãêxê.

**Tupana tüxũ narüngüxêê erü
Cristuarü duũxũgü tixĩgü**

⁴⁻⁵Rü guxũguma pexçax Tupanana moxê chaxã, jerü Ngechuchu ja Cristugagu Tupana poraãcũ pexũ narüngüxêê, rü pexna nanamu ga Naãê i Üünexũ na guxũgutáma pemaã inaxãxũçax. Rü jima Cristugagu pexũ nanatauxchaxêê na nüxũ peixuxũçax i norü ore, rü pexna nanaxã i cuax na meã ngêma orexũ pecuáxũçax. ⁶Rü jemaãcũ ga jexguma nüxũ pexĩnüêgu ga jema ore ga Cristuchiga rü aixcuma pejaxŏgü. ⁷Rü ngêmacax i nhuxma na ípenangüxêêxũ na wena táxarü núma naxũxũ ja tórü Cori ja Ngechuchu ja Cristu, rü Tupana pexna nanaxã i taxũ i cuax na taxuũma pexũ taxuxũçax na naxçax pemaxêxũ. ⁸Rü ngêmaãcũ tá pexna nadau ja Tupana nhuxmatáta nagú i naãne, rü guxũgutáma pexũ naporaexêê na aixcuma pejaxŏgüamaxũçax rü naxçax pemaxêxũçax, na taxúema chixexũmaã

pexũ ixugũxũcax i ngẽxguma wenaxãrũ nũma naxũxgu ja tórũ Cori ja Ngechuchu ja Cristu. ⁹Rũ Tupana rũ guxũguma najanguxẽẽ i norũ uneta. Rũ nũma nixĩ ga pexũ jadexechixũ na aixcuma Nane ja tórũ Cori ja Ngechuchu ja Cristumũcũgũ peixĩgũxũcax.

Nũgũ nitoje ga jaxõgũxũ

¹⁰Pa Chaueneẽgũx, tórũ Cori ja Ngechuchu ja Cristuẽgagu pexũ chacaxũ na wũxigu pegũmaã perũxĩnũẽxũ rũ tama pegũ peitojexũcax. Rũ name nixĩ i aixcuma pegũ pengechaũgũ rũ aixcuma wũxigutama perũxĩnũẽ i peãẽwa. ¹¹Pa Chaueneẽgũx, pemaã nũxũ chixu i ngẽma ore, jerũ Cróetanũxũtanũwa nũxũ chacuáchiga ga pegũmaã na penuẽxũ, rũ tama aixcuma wũxigu na perũxĩnũẽxũ. ¹²Rũ pemaã nũxũ chixu i ngẽma erũ nhuxre i pema rũ:

“Chama rũ Pauruwe charũxũ”, nhaperũgũgũ. Rũ togue rũ:

“Chama rũ Aporuwe charũxũ”, nhaperũgũgũ. Rũ togue rũ:

“Chama rũ Pedruwe charũxũ”, nhaperũgũgũ. Rũ togue rũ:

“Chama rũ Cristuwe charũxũ”, nhaperũgũgũ. ¹³¿Rũ nhuxãcũ nixĩ i ngẽma? ¿Pexcax rũ Cristu rũ marũ nijauxje? ¿Exna pema nũxũ pecuaxgu rũ chama i Pauru chiĩxũ ga curuchawa pexcax chipotaxũ rũ chajuxũ? ¿Rũ exna pema nũxũ pecuaxgu rũ chauẽgagu jiĩxũ ga ípebaiũxũ? ¹⁴Rũ Tupanana moxẽ chaxã, jerũ taxúema pexũ íchabaiũxẽẽ ga pemax. Rũ Crispu rũ Gajuxicatama nixĩ ga íchabaiũxẽẽxũ. ¹⁵Rũ ngẽmacax

taxucũrũwa texé tũgũ tixu na chauẽgagu ítabaiẽxũ. ¹⁶Rũ jemããcũ aixcuma íchanabaiũxẽẽ ga Estéfanatanũxũgũ ta, notũrũ chauxcax rũ taxúema ga togue tũxũ íchabaiũxẽẽ. ¹⁷Jerũ nũma ga Cristu rũ tama choxũ namu ga duũxũgũxũ na íchabaiũxẽẽxũcax, notũrũ choxũ namu na duũxũgũmaã nũxũ chixuxũcax i norũ ore i mexũ i tũxũ maxẽxẽẽxũ. Rũ nanaxwaxe i tauxchaxũ i oremaã nũxũ chixu i ngẽma ore. Erũ ngẽxguma chihama nũxũ cuaxũchixũrũũ nũxũ chixuxgu i ngẽma ore, rũ ngũrũãchi i duũxũgũ rũ tá chaguama narũxĩnũẽ rũ tá nũxũ inajarũngũmaẽ na Cristu jiĩxũ ga tũxũ maxẽxẽẽcũ ga jexguma curuchagu najuxgux.

Cristuwa nixĩ ga Tupana inawéxũ ga norũ pora rũ norũ cuax

¹⁸Rũ ngẽma ore na nhuxãcũ tórũ pecaducax curuchagu najuxũ ga Cristu, rũ wũxi i notũcaxmamare nixĩ naxcax i ngẽma duũxũgũ i pocuwa íxũ. Notũrũ jixema na Tupana tũxũ maxẽxẽẽxũ, rũ nũxũ tacuax na ngẽma ore rũ Tupanaãrũ pora jiĩxũ. ¹⁹Erũ norũ ore i ũmatũxũwa rũ nhanagũrũ ga Tupana:

“Rũ tá ichajanaxoxẽẽ i guxũma i norũ cuax i ngẽma duũxũgũ i nũxũ cuaxũchixũ. Rũ tá nũxũ chaxo i ngẽma duũxũgũarũ cuax”,

nhanagũrũ. ²⁰Rũ nhuxmax, Pa Chaueneẽgũx, ¿Tupanapexewa rũ tacũwa namexũ i ngẽma duũxũgũ i poraãcũ nũxũ cuaxũchixũ? ¿Rũ tacũwa namexũ i ngẽma duũxũgũ i Muĩsé ũmatũxũ i mugũwa ngxũẽtaegũxũ?

¿Rü tacüwa namexũ i ngẽma duũxũgũ i meã nüxũ cuaxgũxũ i nhama i naãneãrũ cuáchigagu na jadexagũxũ? Erũ guxũma i ngẽma cuax i duũxũgũ nagu ruxĩnũẽxũ rü Tupanacax rü taxuwama name.

²¹Notürũ nüma ja Tupana ja guxũxũma cuácũ, rü tama nanaxwaxe na nhama i naãnecũãx i duũxũgũarũ cuágagu na jĩixũ i naxũtawana nangugũxũ i nũmagũ. Notürũ nanaxwaxe na ngẽma norũ ore i mexũgagu na jĩixũ i namaxẽxẽãxũ i ngẽma duũxũgũ i jaxõgũxũ woo togũcax rü notũcaxmamare jixĩgu i ngẽma ore.

²²Ngẽma Judéugũ rü nüxũ nadaugũchaũ i cuaxruũgũ i Tupanaãrũ poramaã üxũ na ngẽmawa nüxũ nacuaxgũxũcax na aixcuma jĩixũ i ngẽma ore i nüxũ ixugũxũ. Rü ngẽma Gregugũ rü naxcax nadaugũ i nhama i naãneãrũ cuax na meã nüxũ nacuaxgũxũcax. ²³Notürũ ngẽma ore i toma nüxũ tixuxũ, rü Cristu ga curuchawa ipotacũchiga nixĩ. Rü ngẽma ore rü naãẽwa nangux i Judéugũ. Rü ngẽma duũxũgũ i tama Judéugũ ixĩgũxũcax rü wũxi i notũcaxmamare nixĩ. ²⁴Notürũ ngẽma duũxũgũ i Tupana idexechixũ i Judéugũ rü exna tama Judéugũ ixĩgũxũ rü ngẽma duũxũgũcax rü Cristuwa nixĩ ga Tupana inawéxũ ga norũ pora rü norũ cuax.

²⁵Rü jema Tupana üxũ ga jexguma najuxgu ga Cristu rü muxũma i duũxũgũcax rü wũxi i ngẽãẽmarexũrũ nixĩ. Notürũ ngẽma Tupana nagu ruxĩnũxũ rü guxũma i nhama i naãnecũãx i duũxũgũarũ cuaxarũ jexera nixĩ. Rü jexguma curuchagu najuxgu ga Cristu rü muxũma ga duũxũgũcax rü natura ga Tupana ga jexguma. Notürũ jexguma nixĩ ga inawéãxũ ga nhuxãcü

guxũ i duũxũgũarũ jexera na naporaxũchixũ. ²⁶Pa Chaueneẽgũix, name nixĩ i nagu perũxĩnũẽ na nhuxãcü Tupana pexũ idexechixũ na norũ duũxũgũ peixĩgũxũcax. Rü noxretama peixĩgu na nüxũ pecuaxũchixũ ega duũxũgũ pexũ ngugũgu, rü noxretama peixĩgu na ãẽxgacũgũ peixĩgũxũ, rü noxretama peixĩgu i ngẽma itaarũ dĩẽruãxũtanũxũ peixĩgũxũ. Notürũ woo ngẽmaãcü peixĩgũgu rü Tupana rü pexũ nidexechi na norũ duũxũgũ peixĩgũxũcax. ²⁷Rü Tupana najadexechi ga jema duũxũgũ ga togũ ga duũxũgũ nüxũ ixuxgu rü taxuũma icuãxũ. Rü jemaãcü nanaxũ ga Tupana na naxãneẽxẽãxũcax i ngẽma duũxũgũ i nüxũ icuaxũchixũ. Rü Tupana najadexechi ga jema duũxũgũ ga togũ nüxũ ixuxgu rü turaexũ. Rü jemaãcü nanaxũ ga Tupana na naxãneẽxẽãxũcax i ngẽma duũxũgũ i poraexũ. ²⁸Rü Tupana najadexechi ga jema duũxũgũ ga togũ nüxũ oexũ, rü nhama i naãnewa taxuũma ixĩgũxũ. Rü jemaãcü nanaxũ ga Tupana na taxuũma jixĩgũxũcax i ngẽma duũxũgũ i tacũ ixĩgũxũ. ²⁹Rü ngẽmacax taxucũrũwama texé tũgũ ticuaxũũ i Tupanapexewa. ³⁰Rü nũmatama ga Tupana nixĩ ga Ngechuchu ja Cristuarũ duũxũgũxũ pexũ jaxĩgũxẽxũ. Rü tatanũwa nanamu ga Cristu na nüma tũxna naxããxũcax i cuax i aixcuma ixĩxũ, rü pecaduwa tũxũ ãnanguxũxẽẽxũcax. Rü nüma ja Cristu nixĩ i tũxũ namaxẽxẽxũ rü tũxũ jamexẽẽgũxũ na aixcuma ixũnẽxũcax i napexewa ja Tupana. ³¹Rü ngẽmacax i Tupanaãrũ ore i ümatũxũwa rü nhanagũrũ:

“Rū ngēxguma texé tūgū
icuḗxūūchaūgu rū name nixī i
tórū Corixū tīcuḗxūū, erū nūma
nixī i tūxū nangūxēēxū”,
nhanagürü.

Cristu ga curuchawa ipotacūchiga

2¹Pa Chaueneēgūx, jexguma noxri petanūwa chaxūxgu na pemaã nūxū chixuxūcaḗ ga Tupanaārū ore i aixcuma ixīxū i Cristuchiga, rū tama nhama nūxū cuḗxūchixūrūūācūma pemaã chidexa, rū tama ore ga guxchaxūmaã nixī ga pemaã nūxū chixuxū. ²Jerū jexguma petanūwa chajexmagu, rū Cristuchigaxūxīcatama pemaã chixu. Rū taxuūma ga ḗacū ga togu charūxīnū. Rū jemaācū Ngechuchu ja Cristu ga curuchawa ipotacūguxicatama nixī ga charūxīnūxū. ³Rū jexguma petanūwa chaxūxgu rū chauxcaḗ rū nataxuma ga chorū pora, rū chorū muūmaã pepexewa chidurux. ⁴Rū jexguma pemaã chidexagu rū pemaã nūxū chixuxgu ga Tupanaārū ore, rū tama nhama nūxū cuḗxūchixūrūūācūma pemaã nūxū chixu na jemaācū pexū chanangūchaūxēēxūcaḗ na pejaxōgūxūcaḗ. Notürü Tupanaã i Üünexūārū ngūxēēmaã rū Tupanaārū poramaã nixī ga pexū chanangūchaūxēēxū. ⁵Rū jemaācū Tupanaārū poramaã pemaã nūxū chixu ga jema ore na Tupanagagu jīxū na nūxū pejaxōgūxū, rū tama nhama i naānecūāx i duūxūgūarū cuágagu na jīxū.

Tupana rū Naãe i Üünexūwa nūgū tūxū nacuḗxēē

⁶Notürü pemaã nūxū chixu, rū ngēxguma natanūwa changēxmagu i

ngēma duūxūgū i marū meāma jaxōgūxū, rū ngēxguma nixī i chanangūxēēxū i ngēma aixcuma taxū i cuḗx i maxū i üünexūchiga ixīxū. Notürü ngēma cuḗx rū tama nhama i naānewa ne naxū, rū bai i nhama i naānēārū āēxgacūgū i paxa tá ijarūxoxūwa ne naxū. ⁷Notürü ngēma cuḗx rū Tupanawa nixī i ne naxūxū. Rū ngēma cuḗx nixī ga noxri taūta naāne ūxgu Tupanaxīcatama nūxū cuáxū ga na nhuxācū tá tūxna naxāāxū i maxū i taguma gūxū. ⁸Notürü jema Tupana nagu rūxīnūxū, rū taxuūma ga nhama ga naānecūāx ga āēxgacū nūxū nacuḗx. Jerū jexguma chi aixcuma nūxū nacuḗxgūgu ga jema Tupana nagu rūxīnūxū rū tau chima curuchawa najapotagū ga guma mecū ja tórū Cori. ⁹Notürü jema Tupanaārū ore i ümatūxū nūxū ixuxūrūūācū nangupetū. Erū norü orewa rū nhanagürü:

“Rū ngēma duūxūgū i Tupanaxū ngechaūgūxūcaḗ, rū nūma nanamexēē i ḗacū i taxūema nūxū dauxū, rū taguma texé nūxū īnūxū, rū bai i texé nagu rūxīnūxū”,

nhanagürü i norü orewa. ¹⁰Rū ngēma Tupana mexēēxū naxcaḗ i ngēma duūxūgū i nūxū ngechaūgūxū, rū nhuxma rū tūxū nūxū nacuḗxēē i ngēma, jerū nūma nanamu ga Naãe i Üünexū na taxcaḗ nangoxēēāxūcaḗ. Rū ngēma Naãe i Üünexū rū guxūxūma nacuḗx, rū aīxurūxū i ngēma Tupanaxīcatama nūxū cuáxū rū ta nūxū nacuḗx. ¹¹Rū duūxūgūtanūwa rū ḗtexé nūxū tacuḗx na ḗacūgu naxīnūxū ja wūxi ja jatū? Rū naãēxīcatama nixī i nūxū cuáxū i ngēma

nagu naxīnūxū i ngēma jatū. Rū ngēxgumarūū ta Tupanaāē i Ūūnexūxīcatama nixī i nūxū cuáxū na ſacūgu naxīnūxū ja Tupana. ¹²Rū jixema rū tama nhama i naānecūāx i naāē nixī i ijaungxūū. Notūrū Naāē i Ūūnexū ga Tupana nūma muxū nixī ga ijaungxūū, na aixcuma nūxū icuáxūcax i guxūma i ngēma mexūgū ga Tupana norū ngechaūmaā tūxna āmarexū. ¹³Rū nhūxma na pemaā nūxū tixuxū i ngēmachiga, rū Tupanaāē i Ūūnexū toxna āxū i oremaā nixī i pemaā nūxū tixuxū. Rū tama ore i torū cuaxwa tajaxuxūmaā nixī i pemaā nūxū tixuxū. Rū ngēmaācū nūxū tixu i Tupanaāē i Ūūnexūārū ore namaā i ngēma duūxūgū i aixcuma Tupanaāē nawa ngēxmagūxū. ¹⁴Rū texē ja tama Tupanaāē i Ūūnexū tūmawa ngēxmaxē, rū taxucūriūwa tanajaxu i ngēma Tupanaāē i Ūūnexū tūxū ngūxēēxū, erū tūmācax ja jīxema duūxē rū notūcaxmamare nixī. Rū tama nūxū tacuaxéga erū jīxema Tupanaāē i Ūūnexū tūmawa ngēxmaxēxīcatama tixī ja nūxū cuáxe na tanangugūxū na nhuxū nhaxūchiga jīixū i ngēma Tupanaāē i Ūūnexū tūxū ngūxēēxū. ¹⁵Rū jīxema duūxē ja Tupanaāē i Ūūnexū tūmawa ngēxmaxē, rū meā tanangugū i guxūma. Notūrū ngēma togū i duūxūgū i tama Tupanaxū cuaxgūxū, rū taxucūriūwama tūmaārū maxūxū nangugū ja jīxema duūxē ja aixcuma Tupanaāē tūmawa ngēxmaxē. ¹⁶Erū Tupanaārū ore i ūmatūxūwa rū nhanagūrū:

“¿Texē nūxū tacuax na ſacūgu naxīnūxū ja tórū Cori? ¿Rū texē nūxū tacuax na Tupanaxū taxucūxēxū?”

nhanagūrū. Notūrū jixema nixī i aixcuma nūxū icuáxū i ngēma Cristu nagu rūxīnūxū.

**Pauru rū Aporu rū wūxigu
Tupanaāxū napuracūe**

3 ¹Pa Chaueneēgūx, jexguma noxri petanūwa changuxgu, rū taxucūriūwa ngēma duūxūgū i Tupanaāē nawa ngēxmaxūmaā chidexagurūūācūma pemaā chidexa. Notūrū nhama i naānecūāx i tama Tupanaxū cuaxgūxūmaā chidexagurūū nixī ga pemaā chidexaxū. Jerū pema rū jexwacax, pejaxōgū ga jexguma, rū jemācax jexwacax jaxōgūxūmaā chidexagurūūācūma pemaā nūxū chixu ga Cristuchiga. ²⁻³Rū tauxchaxū ga oremaā pexū changūxēē, ngēxgumarūū i wūxi i ōxchana ega noxri nabuxgu rū naēgūnenixū ja tauxchaācū jaxaxūne nūxna taxā. Rū jemaācū tauxchaxū ga oremaā pemaā nūxū chixu ga Tupanaārū ore ga noxrix, jerū taxucūriūwa nūxū pecuaxéga ga Tupanaārū ore ga guxchaxū. Rū nhūxma rū ta tama nūxū pecuaxéga i Tupanaārū ore i guxchaxū, erū nhama tama jaxōgūxū i duūxūgūrūūtama pemaxē. Rū dūcax, ngēxguma nhūxma rū ta peixauxāchiwaxegu rū pegūmaā penuēgu, rū ngēmawa nangox na ngēma tama jaxōgūxūrūūtama nagu perūxīnūēxū rū nhama i naānecūāxriūtama na pemaxēxū. ⁴Rū ngēxguma petanūwa wūxie nhagūgu rū:

“Chama rū Pauruwe charūxū”,
nhagūgu, rū toge rū:
“Chama rū Aporuwe charūxū”,
nhagūgu, rū ngēmawa nūxū tacuax na

ngēma duūxūgū i tama
 jaxōgūxūrūūtama na pemaxēxū. ⁵Rū
 ngēxguma meā nagu rūxīnūēgu, ¿rū tacū
 chixī i chama i Paurux? rū ¿tacū nixī i
 nūma i Aporux? Toma rū Tupanaārū
 duūxūgūmare tixīgū, rū togagu nixī ga
 nūxū pejaxōgūxū ga tórū Cori ja
 Ngechuchu. Rū wūxichigū ga toma rū
 tanaxū ga jema puracū ga tórū Cori
 toxna āxū. ⁶Rū chauxūtawa nixī ga nūxū
 pexīnūēxū rū pejaxōgūxū ga Tupanaārū
 ore ga noxrix, rū Aporu nixī ga pexū
 rūngūxēēcū na jexeraācū meā
 pejaxōgūxū ga jema ore. Notūrū Tupana
 nixī ga pexna naxācū ga maxū. ⁷Rū
 ngēmacax woo jīxema tūxira
 duūxūgūmaā nūxū ixuxe i Tupanaārū
 ore rū woo jīxema wixwena jexeraācū
 duūxūgūxū ngūxēēxē, rū taxuūma
 tixīgū. Notūrū Tupana nixī ja guxūma
 ūcū, erū nūma nixī i duūxūgūxū
 namaxēēxē. ⁸Rū ngēmaācū ja jīxema
 tūxira duūxūgūmaā nūxū ixuxe i
 Tupanaārū ore, rū jīxema wixwena
 jexeraācū duūxūgūxū ngūxēēxē rū
 tawūxigumare i ngēma puracūwa.
 Notūrū Tupana rū tá tūxū nanaxūtanū i
 tūmaārū puracū ja wūxichigū
 ngēxgumarūū na nhuxācū nūxū
 tapuracūēxū. ⁹Rū ngēmaācū i chama i
 Pauru rū taeneē ja Aporu rū wūxigu
 Tupanaāxū tapuracūe. Rū ngēmaācū nixī
 i petanūwa napuracūxū ja Tupana. Rū
 perū maxūwa nixī i napuracūxū na
 nūma nanaxwaxexūācūma peixīgūxūcax.
¹⁰Rū chama nixī ga Tupana choxū muxū
 na chaxira pemaā nūxū chixuxūcax ga
 Cristuchiga. Rū togū nixī ga chawena
 jexeraācū pexū ngūxēēxū. Notūrū
 guxāma ja texé ja naxūxe i nhaā puracū

rū tanaxwaxe i taxuāē na meā
 tanaxūxūcax. ¹¹Rū nhaā puracū rū
 Ngechuchu ja Cristuwa nixī ga
 inaxūgūxū, rū ngēmacax taxucūruwama
 texé tajangucuchixēē i to i tūxū
 maxēxēēxū. ¹²Rū nhuxma na norū
 puracū ixūxū i wūxichigū i jixema, rū
 tanaxwaxe i taxuāē na aixcuma meā
 naxūxū i ngēma. Erū jīxema aixcuma
 meā naxūxe i norū puracū, rū nhama
 wūxi i ĩpataarū ūruū i uirumū rū
 dīerumū rū nuta i mexēchixūmaā
 ūpataxūrūū tixī. Notūrū jīxema tama
 aixcuma meā naxūxe i ngēma Cristuarū
 puracū rū nhama ĩpataarū ūruū i
 chixexū i naī rū naixātū rū
 dexnemenaxāmaremaā ūpataxūrūū tixī.
¹³Notūrū ngēxguma naguxgu i naāne, rū
 tá nangox na nhuxācū naxūāxū i
 Tupanaārū puracū i wūxichigū i duūxū.
 Erū ngēma ngunexūgu rū tá nangēxma
 ja ūxū ja taxūchine. Rū nhama tacū
 ūxūwa figuxūrūū tá nixī i Tupana nūxū
 na ūxū i wūxichigū i duūxūārū puracū
 na nūxū nacūāxūcax ngoxi aixcuma
 name rū exna tama. ¹⁴Rū jīxema
 aixcuma meā naxūxe i Cristuarū puracū,
 rū jima ĩpata ja taixūne ja tama ūxūmaā
 ixaxūnerūū tá nixī i ngēma tūmaārū
 puracū. Rū tá Tupanaxūtawa tanajaxu i
 tūmaārū natanū naxcax i ngēma taxūxū.
¹⁵Notūrū jīxema tama aixcuma meā
 naxūxe i ngēma puracū, rū jima ĩpata ja
 tama taixūne ja ūxūmaā ixaxūnerūū tá
 nixī i ngēma tūmaārū puracū. Rū tá
 ngēxma inajarūxomare i guxūma i
 ngēma taxūxū. Rū tūxicatama
 tāxūxūtāma tixa nhama wūxi i duūxū i
 ūxūemawa ĩjagoxūrūū. ¹⁶¿Tama exna
 nūxū pecuax i pema rū Tupanapata na

peixīgūxū, rü Tupanaãe i Üünexū rü petaniwa na namaxūxū? ¹⁷Rü ngëxguma texé pexū chixetanüxëegu, rü Tupana tá tūxū napocu, erü Tupanapata ja nawa namaxūne rü naxūüne. Rü pematama nixī ja jima Tupanapata na peixīgūxū. ¹⁸Tama name i texé tūgūtama tawomüxëe. Rü ngëxguma petaniwa texé tūgūgu rüxīnūgu na wūxi i duūxū i nüxū cuáxe na tīxū i nhama i naãnewa, rü name nixī i nhama taxūūma tacuáxūrū tūgū tixīxëe. Rü ngëxguma tá nixī i wūxi i duūxū i aixcuma nüxū cuáxe tá tīxū. ¹⁹Erü nhama i naãneärü cuax rü wūxi i ngëãëmarexū nixī i Tupanacax. Erü Tupanaärü ore i ümatüxūwa rü nhanagürü:

“Rü ngëma duūxūgü i nügūgu rüxīnūxū na nüxū cuaxūchigüxū jīxū, rü norü cuaxgutama ínanatüxëe ja Tupana”,

nhanagürü. ²⁰Rü ngëma ore rü nhanagürü ta:

“Tórü Cori ja Tupana rü nüxū nacuax na taxuwama namexū i ngëma nagu naxīnūxū i ngëma duūxūgü i nüxū icuaxūchixū”,

nhanagürü. ²¹Rü ngëmacax tama name na texé tūgū icuaxūxū na tacü rü jatüarü ngüxëetaewe na tarüxūxūcax. Erü Tupana rü marü pexna nanaxā i guxūma na pexrü jīxūcax. ²²Rü ngëmacax i chama i Pauru, rü taeneë ja Aporu, rü taeneë ja Pedru, rü nhama i naãne, rü torü maxū, rü torü ju, rü nhamatama i ngunexū, rü moxūärü ngunexū, rü guxūma i ngëma rü pexrü nixī. ²³Rü pematama rü Cristuarü peixīgü. Rü Cristu rü Tupanaärü nixī.

Jema ngüexūgü ga Ngechuchu imugūxūärü puracūchiga

4 ¹Rü ngëmacax tanaxwaxe i tomaã nagu perüxīnūe na Cristuarü puracütanüxūmare na tixīgūxū. Rü nüma nixī i toxū namuxū na pexū tangüxëxūcax ga jema ore ga noxri Tupanaxīcatama nüxū cuáxū. ²Rü ngëxguma texé tacü rü puracü tūxū üxëegu, rü tanaxwaxe i aixcuma tajanguxëe i ngëma puracü i tūxna taxāxū na ngëmaäcü inawéxūcax na aixcuma wūxi i duūxū i mexū ixīxū. ³Rü ngëmacax i nhuxma na meã chajanguxëechaüxū i ngëma puracü i Tupana choxna äxū, rü taxuücaxma chaugücax chaxoegaãe ega woo choxna pecagu rü exna tacü rü äëxgacügü choxna caxgu naxcax i ngëma puracü i chaxūxū. Rü woo i chamatama rü taxuxūcaxma íchicuax na ngextá chixri chanaxūxū i ngëma puracü. ⁴Notürü nhuxma na chatamata nagu charüxīnūxū na nataxuūma i chorü chixexū i Tupanapexewa, rü tama ngëmacax Tupana choxū nadau na changearü pecaduáxū. Erü nümatama ja tórü Cori ja Tupana nixī i aixcuma choxū nacuáarü maxūáxū. ⁵Rü ngëmacax tama name na texéxū pengugüarü maxūáxū naxūpa na núma naxūxū ja tórü Cori. Notürü name nixī i meã nüxū ípenanguxëe, erü nüma tá nixī i nangoxëëäxū i guxūma i ngëma nhuxma icúxū rü guxūma i ngëma duūxūgü naãewa nagu rüxīnūxū. Rü ngëxguma tá nixī ja Tupana i tümamaã nataãëxū ja wüxichigü ja jíxema aixcuma mexū ügüxe. ⁶Pa Chaueneëgüx,

perü mexũcax nixĩ i pemaã nüxũ tixuxũ i ngẽma ore na nhuxãcü Tupana naxwaxexũ na pemaxẽxũ. Rũ chama rü Aporu nixĩ i perü cuaxruũgü tixĩgũxũ na towa pengúexũ na Tupanaãrũ ore pemaã nüxũ ixuxũrüũ penaxũxũ. Rũ ngẽmacax tama name na wüxi i perü nguxẽetaexũmaã petaãẽgũxũ rü to rü nüxũ pexoexũ. ⁷Rũ nhuxma rü pexna chaca, ¿rũ texẽ tixĩ ja jixema togüarũ jexera pexũ ixĩxẽẽxẽ? ¿Rũ tacü rü cuax i pexũ ngẽxmaxũ i tama Tupana nügũchiga pexna ãxũ? Rũ nhuxma na nüma pexna naxããxũ i ngẽma cuax ¿rũ tüxcüũ pegü peicuaxũũgü nhama pematama perü poramaã penajaxuxũrüũ? ⁸Rũ pegügu perüxĩnüẽgu rü aixcuma marũ meãma Tupanaxũ peicuaxũchi rü marũ pexũ nangẽxma i guxũma i tacü i penaxwaxexũ na naxũtawa pengugũxũcax. Rũ pegügu perüxĩnüẽgu rü ãẽxgacügu i taxũrüũ peixĩgü rü taxuũma i toxũtawa penaxwaxe i nhuxmax. ¡Chierũ aixcuma Tupanaxewewa ãẽxgacügu peixĩgügu na toma rü ta wüxigu pemaã ãẽxgacügu na tixĩgũxũcax! ⁹Rũ toma na Ngechuchu toxũ imugũxũ, rü chauxcax rü wixwe toxũ nawogü ja Tupana. Rũ nhama pocuexũ i juewa ixũrüũ tixĩgü. Rũ nhama wüxi i tacü i nüxũ nacugüexũrüũ tixĩgü i napexewa i Tupanaãrũ orearũ ngeruũgü i dauxũcüãx, rü napexewa i nhama i naãnecũãx i duũxũgü, rü napexewa i guxũma i tacü i Tupana üxũ. ¹⁰Rũ nhuxma na Cristuwe tarüxixũ, rü ngẽmacax taxuũma icuáxũ toxũ nawogü i duũxũgü, notürü i pema rü pegügu perüxĩnüẽgu rü guxũxũma pecuax i

Cristuchiga. Toma nüxũ tacuax na duũxũgüpepexewa taturaexũ, notürü i pema rü pegügu perüxĩnüẽ na aixcuma peporaexũ. Rũ duũxũgü toxũ naxo, notürü pexũ nangechaũgü. ¹¹Rũ nhuxma rü ta tama inajacuax na ngúxũ tingegũxũ, erü nhuxma rü ta taija toxũ nangux, rü titawae, rü tangexchiru. Rũ duũxũgü rü chixri tomaã nachopetü, rü tangepata. ¹²Rũ tipae na jeũcürü toxmexmaã tapuracüechaxũ. Rũ duũxũgü rü tacü tomaã nixugüe, notürü i toma rü mexũ i oremaã tanangãxũgü. Rũ towe ningẽxũtanü, notürü jaxna namaã taxĩnüẽ. ¹³Rũ chixexũmaã tochiga nidexagü, notürü i toma rü meã nachiga tidexagü. Rũ nhama guxchirexũ nadaugũxũrüũãcuma tomaã namaxẽ, rü nhama i duũxũgü i taxuwama mexũrüũ tomaã nixĩgü. Rũ nhuxma rü ta rü ngẽmaãcü tomaã namaxẽ. ¹⁴Tama pexcax chanaxumatü i nhaã popera na pexũ chaxãneẽxẽxũcax. Notürü pexcax chanaxumatü na pexũ chixucuxẽgũxũcax chauxacügũxũchirüũ, erü pexũ changechaũ. ¹⁵Erü woo nangẽxmagu i muxũma i perü nguxẽerũgü i Cristuchiga pexũ ngúxẽẽxũ, notürü chaxicatama nixĩ i penatü chiixũ ga Cristuxũ na pejaxuxũwa. Jerü chauxũtawa nixĩ ga noxri ga penajaxuxũ ga Ngechuchu ja Cristuarü ore i tüxũ maxẽxẽxũ. Rũ ngẽmacax chaxicatama nixĩ i penatü chiixũ i perü õwa. ¹⁶Rũ ngẽmacax pexũ chacaãxũ na chama chamaxũxũãcuma meã na pemaxẽxũcax. ¹⁷Rũ ngẽmacax pexũtawa chanamu ja Timúteu ja poraãcü nüxũ changechaũcü ja chaune ixĩcü i tórü Coriarü orewa. Rũ nüma rü

aixcuma meã najanguxêẽ i guxũma i ngẽma nawa chanamuxũ. Rũ nũma tá pexna nüxũ nacuxãchixêẽ na nhuxãcü Ngechuchu ja Cristu naxwãxexũãcũma meã chamaxũxũ ngẽma guxũnema ja tupauca i íchixũgũxũwa chanangũxexẽxũrũũ. ¹⁸Rũ nhuxre i pemagũ rũ pegũ peicuãxũũgũ, erũ nagu perũxĩnũẽ na tãũxũtãma pexũtawa íchajadauxũ. ¹⁹Notürũ ngẽxguma nanaxwãxegu ja tórũ Cori, rũ paxa tá ngẽma chaxũ na pexũ íchajadauxũcãx. Rũ ngẽxguma rũ tá chamaxũchi nüxũ chadau ngoxi aixcuma nüxũ nangẽxma i Tupanaãrũ pora rũ ẽxna nidexagũmare i ngẽma duũxũgũ i nügũ icuãxũũgũxũ. ²⁰Erũ Tupana ãẽxgacũ íjĩixũwa rũ tama dexagũmare nixĩ notürũ ngẽma nangẽxma i pora. ²¹¿Rũ nhuxma rũ tacũ ẽxna nixĩ i penaxwãxexũ i pemagũ? ¿Penaxwãxe na pexũ chingagũxũ i ngẽxguma ngẽma changuxgu, rũ ẽxna penaxwãxe na pexũ changechaũãcũma rũ pemaã chamecũmaãcũma pexũ na íchajadauxũ?

Duũxũgũ i chixri maxẽxũchiga

5 ¹Rũ duũxũgũ nüxũ nixugũgũ rũ wũxi i jatũ i petanũwa rũ naẽrũcũmaãtama naxãmax. Rũ ngẽma nixĩ i pecadu i poraãcü chixexũchixũ, erũ woo ngẽma duũxũgũ i tama jaxõgũxũtanũwa rũ tama ngẽmaãcü nangupetũ. ²¿Rũ nhuxãcü i pema i ngẽxguma i pegũ peicuãxũũgũamãxũ? Rũ narũmemaẽ chi nixĩ na poraãcü pengechaũgũxũ. Rũ ngẽma jatũ i ngẽma chixexũ xũxũ rũ name nixĩ na ípenamuxũchixũ i petanũwa. ³Rũ woo tama petanũwa changẽxmagu i chamax,

notürũ guxũguma pegu charũxĩnũ. Rũ nhama pexũtawa changẽxmaxũrũũ rũ tórũ Cori ja Ngechuchu ja Cristuégagu pemaã nüxũ chixu na tacũ tá namaã pexũxũ i ngẽma duũxũ. ⁴Rũ name nixĩ i tórũ Cori ja Ngechuchu ja Cristuégagu pengutaquexegũ. Rũ nũma ja tórũ Cori ja Ngechuchu rũ tá napetanũgu na pexũ naporaexẽẽxũcãx. Rũ chama rũ tá pexna chacuãxãchi i chorũ jumuxẽwa. ⁵Rũ ngẽma norũ pocu i tá nüxna pexãxũ i ngẽma jatũ, rũ ngẽma tá nixĩ na ípenamuxũchixũ i petanũwa na Chatanã ngũxũ nüxũ ingexẽẽxũcãx. Rũ ngẽmaãcü tá inajarũxo i naxũneãrũ ngũchaũ i chixexũ, notürũ naãẽ rũ tá namaxũ i ngẽxguma wena núma naxũxgu ja tórũ Cori ja Ngechuchu. ⁶¿Rũ tama name i pema rũ pegũ peicuãxũũ naxcãx i ngẽma pexũxũ! ¿Tama ẽxna nüxũ pecuãx i ngẽma ore i nhaxũ:

“Wũxi i íraxũ i põũãrũ puxẽẽrũũ rũ taxũma i põũchara nipuxẽẽ”, nhaxũ? ⁷Rũ ngẽmacãx name nixĩ i nüxũ perũxoe i guxũma i nuxcũmaxũxũ i pecũma i pexũ chixexẽẽxũ. Rũ ngẽxguma ngẽmaãcü penaxũxgu, rũ nhama ngexwacaxũxũ i põũ i ngearũ puxẽẽrũũãxũ i Üpetũchigaarũ petawa ingõxũrũũ tá peime. Rũ nhuxma i pema rũ aixcuma ngexwacaxũxũ i duũxũgũ peixĩgũ, jerũ Cristu rũ nhama wũxi i carnerurũ marũ tachicũũ tórũ pecaducãx naju. ⁸Rũ ngẽmacãx name nixĩ i nüxũ tarũxoe i nuxcũmaxũxũ i tacũma i chixexũgũ rũ aixcuma Tupanagu tarũxĩnũẽ rũ meã naxcãx tamaxẽ, erũ ngexwacaxũxũ i norũ duũxũgũ tixĩgũ. ⁹Nũxĩraũxũ gã

chorū poperawa rü pemaã nüxũ chixu na tama natanügu pexãgüxũ i ngẽma duũxũgü i naĩ i ngemaã naxũneãrũ ngúchaũ ügüxũ. ¹⁰Notürü na jema nhachaxũ pexũ, rü tama pemaã nüxũ chixu na nüxna

peixĩgachitanüxũchixũ i ngẽma duũxũgü i tama jaxõgüxũ i naĩ i ngemaã maxẽmarexũ, rü exna ngẽma duũxũgü i guxũma i tacü nügüna nuãchigüchaũgüxũ, rü exna ngĩtaaxgüxũ, rü exna ngẽma duũxũgü i tupananetachicünaaxãxũ icuaxüüügüxũ. Erü ngẽxguma chi naxchaxwa ípechoxũgu i ngẽma duũxũgü, rü chi taxucürüwa i nhama i naãnewa pengẽxmagü. ¹¹Notürü jexguma pemaã nüxũ chixuxgu na tama natanügu pexãgüxũ i ngẽma duũxũgü i chixri maxẽxũ, rü nachiga chidexa i ngẽma duũxũgü i nügu ixugüxũ na peeneëgü i jaxõgüxũ na jixĩgüxũ notürü naĩ i ngemaã maxẽ, rü exna aüexũ, rü exna tupananetachicünaaxãxũ icuaxüüügüxũ, rü exna oregütaaxgüxũ, rü exna ngãxewaxegüxũ, rü exna ngĩtaaxgüxũ. Rü ngẽma duũxũgü nixĩ i pemaã nüxũ chixuxũ na tama namexũ na natanügu pexãgüxũ rü bai i namaã na pechibüexũ. ¹²⁻¹³Erü tama chaaxmexwa nangẽxma na nüxna chaaxũ i ngẽma duũxũgü i tama Tupanaãxũ jaxõgüxũ. Rü Tupana tá nixĩ ja nüxna cacü i ngẽma duũxũgü. Notürü i pema rü pemexwa nangẽxma na nüxna pecaxũ i ngẽma peeneëgü i jaxõgüxũ i tama meã maxẽxũ. Rü name nixĩ na petanüwa ípenamuxũchixũ i ngẽma duũxũ i chixri maxẽchaxũ.

**Ngẽxguma tacü rü guxchaxũ tüxũ
ngẽxmagu taeneẽmaã, rü tama
name i ãẽxgacügü i
tama jaxõgüxũpexewa
tajamexẽe i ngẽma**

6 ¹Rü ngẽxguma wüxie i pema pexũ nangẽxmagu i tacü rü guxchaxũ i wüxi i peeneë i jaxõxũmaã, çrü tüxcüü wüxi i ãẽxgacü i tama jaxõxũãrũ ngũxẽẽcax ípejaca na nüma pexũ namexẽẽãxücax i ngẽma perü guxchaxũgü? çRü tama exna inamexũ i ngẽma peeneëgü i jaxõgüxũ na namexẽẽgüxũ i ngẽma perü guxchaxũgü? ²çTama exna nüxũ pecuax na jixema na jaxõgüxũ tá jiixũ i naãneãrũ guxgu nüxna icagüxũ i guxũma i nhama i naãnecüãx i duũxũgü? Rü nhuxma na pema tá jiixũ i nhama i naãnecüãx i duũxũgüxũ peicagüxũ, çrü tüxcüü taxucürüwa i pematama penamexẽe i ngẽma perü guxchaxũgü i írachiréxũ? ³çTama exna nüxũ pecuax rü woo ngẽma dauxcüüãx i Tupanaãrũ orearü ngeruüügü, rü jixema tá jiixũ i nüxũ icagüxũ? Rü ngẽmacax nixĩ i jexeraãcü pemexwa nangẽxmaxũ na nhuxãcü penamexẽẽxũ i ngẽma guxchaxũgü i nhama i naãnewa pexũ ngẽxmagüxũ. ⁴Rü ngẽmacax, ngẽxguma tacü rü guxchaxũ pexũ ngẽxmagu i nhama i naãnewa, çrü tüxcüü i ngẽma ãẽxgacügü i tama jaxõgüxũxütawa pegü ípejauaxũgüxũ na pexũ namexẽẽgüãxücax i ngẽma? ⁵Rü pemaã nüxũ chixu i ngẽma ore na pexãneëxücax. çExna tataxuma i petanüwa ja wüxie ja nüxũ cuáxe na tanamexẽẽxũ i ngẽma guxchaxũgü i petanüwa ngẽxmaxũ? ⁶Rü tama

pegūmaã penuẽxĩcatama, notürü naétü rü ãẽxgacügü i tama jaxögüxũxũtawapexĩ na penamexẽẽxũcax i ngẽma perü guxchaxũgü. ⁷Rü ngẽma na pegūmaã penuẽxũ, rü ngẽma rü poraacü chixexũ nixĩ. ¿Rü tũxcüũ tama jaxna namaã pexĩnüẽ i ngẽma guxchaxũgü i peeneẽ pemaã üxũ? ¿Rü tũxcüũ tama namaã peporae ega texé perü ãacũcax ngĩxgux? ⁸Notürü i pema rü peeneẽmaãtama chixexũ pexüe, rü nüxũ pengĩx i ngẽma peeneẽgü i jaxögüxũ. ⁹⁻¹⁰¿Tama exna nüxũ pecuax na ngẽma duũxũgü i chixexũ ügüxũ rü nataxuxũtama i nachica i ngextá Tupana ãẽxgacü jĩixũwa? ¿Rü tama name i pegütama pewomüxẽẽgü! Erü ngextá Tupana ãẽxgacü jĩixũwa rü nataxutáma i nachica i ngẽma duũxũgü i naĩ i ngemaã ipexũ, rü ngẽma duũxũgü i tupananchicũnaxãxũ icuaxũũgüxũ, rü ngẽma duũxũgü i naxmaxẽchita rü exna natechita ngẽãẽxũ, rü ngẽma jatügü i naxrüũ jatũxũmaã ngẽãẽxũ, rü ngẽma ngĩtaaxgüxũ, rü ngẽma duũxũgü i nügünaxica nanuxãchixũ i norü ngẽmaxũgü, rü ngẽma duũxũgü i ngãxẽwaxegüxũ, rü ngẽma duũxũgü i oregũtaaxgüxũ, rü ngẽma duũxũgü i womüxẽẽwaxegüxũ. Rü guxũma i ngẽmagü rü nataxutáma i nachica i ngextá Tupana ãẽxgacü jĩixũwa. ¹¹Rü jexgumarũtama peixĩgü ga nhuxre ga pema ga üpax. Notürü i nhuxma ja Tupana rü marü pexũ inapani i perü chixexũ na noxrüicatama peixĩgũxũcax. Rü nhuxma rü aixcuma napexewa peime jerü Naãe i Üünexũ rü tórü Cori ja Ngechuchu ja Cristuégagu marü perü pecaduna pexũ inanguxũxẽẽ.

Nhuxácü naxüüne i taxüüne

¹²Rü nhuxre i pema rü nhaperügügü:

“Rü marü name na chanaxũxũ i ngẽma chanaxwaxexũ”, nhaperügügü. Rü aixcuma nixĩ i ngẽma, notürü tama guxũ i ngẽma ixügüxũ rü tũxũ name. Rü aixcuma nixĩ i Tupana choxũ ínguxuchixẽẽxũ na chanaxũxũcax i ngẽma chanaxwaxexũ, notürü tama name na ãacü rü chixexũgu chaugü changuxẽẽxũ na chamaã inacuáxũcax. ¹³Rü ngẽxgumarũũ ta rü nhuxre i duũxũgü rü nhanagürügü:

“Rü õna rü taxüñecax nixĩ, rü taxüüne rü õnacax nixĩ”, nhanagürügü. Rü aixcuma ngẽmaãcü nixĩ, notürü ja Tupana rü tá inajanaxoxẽẽ i guxũma i ngẽma. Rü taxüüne rü tama naĩ i ngemaã namaã na ingẽãẽmarexũcax nixĩ. Erü taxünemaã nixĩ i naxũxũ i tórü Coriarü ngúchaũ. Rü tórü Cori nixĩ ja taxünexũ maxẽẽcũ. ¹⁴Rü jema Tupana wena namaxẽẽxũrüũ ga tórü Cori ja Ngechuchu, rü ngẽxgumarũũ tá ta norü poramaã wena tũxũ namaxẽẽxẽ. ¹⁵¿Rü tama exna nüxũ pecuax na ngẽma pexene rü Cristuarü na jĩixũ? ¿Rü nhuxácü i ngẽma chaxune i Cristuarü ixĩxũ rü ngexũ i ngẽãẽxũmaã inapexũ? Taxucürüwama ngẽmaãcü nixĩ. ¹⁶¿Rü exna tama nüxũ pecuax ega wüxi i ngexũ i ngẽãẽxũmaã inapexgu ja wüxi ja jatü rü ngẽma taxre i naxüüne rü wüxitama i naxüüne jĩixũ? Erü Tupanaãrü ore i ümatũxũwa rü nhanagürü:

“Ngẽma taxre i naxüüne rü wüxitama i naxüüne tá nixĩ”, nhanagürü. ¹⁷Notürü ngẽxguma wüxi i duũxũ rü tórü Cori ja Cristuaxũ

jaxōõxgu, rü ngēma naãe i ngēma duũxũ rü Cristuãēmaã wüxigutama narüxinũe. ¹⁸Rü ngēmacax name nixĩ na nüxũ perüxoexũ i pexeneärü ngúchaũ na pexüxũ. Rü guxũma i togü i pecadu i wüxi i duũxũ üxũ rü tama naxünexũ nachixexēe. Notürü ngēma na naĩ i ngemaã nangēãxũ rü ngēma waxi nixĩ i naxünexũ chixexēxũ. ¹⁹¿Tama exna nüxũ pecuax i pexene rü Tupanaãe i Üünexũpata na jixĩ? Rü pegu nixĩ i naxächüxũ i ngēma Naãe i Üünexũ i Tupana pexna muxũ. Rü ngēmacax i pema rü tama pegüarü joratama peixigü. ²⁰Erü Tupana rü marü pexcax nataxe rü poracü nüxũ petatanü. Rü ngēmacax penaxwaxe i ngēma pexenemaã meã Tupanacax pemaxē na ngēmaãcü namaã penataxēxũ ja Tupana.

Ucuxégü i âmāxchiga rü ätechiga

7 ¹Rü nhuxma rü tá pexũ changãxũ ga jema âmāxchiga ga choxna naxcax peçaxũ ga perü poperawa. Rü narümemaē chi nixĩ i noxtacüma tama naxāmax ja jatü. ²Notürü ngēma na naxũneärü ngúchaũ na naxügümarexũ i duũxũgü, rü narümemaē nixĩ i wüxichigü ja jatü rü na naxāmaxũ, rü wüxichigü i nge rü na naxätexũ. ³Rü jima jatü ja âmācü rü taxucürüwama naxmāxna nügü ninuxü. Rü ngēma nge i ätecü rü taxucürüwama ngítana ngīgü ijanuxü. ⁴Erü ngēma nge i ätecü rü tama ngīgüxũneärü joratama ijixĩ, erü ngíte nixĩ ja ngixĩneärü jora ixĩcü. Rü ngēxgumarüũ ja ngíte rü tama nügüxũneärü jora nixĩ, erü naxmāx ijixĩ i naxũneärü jora ixĩcü. ⁵Rü tama name i

wüxi ja jatü rü namāxna nügü ninuxü, rü exna wüxi i ngecü rü ngítana ngīgü ijanuxü, ega tama nügümaã namexēēägu na nhuxre i ngunexũ tama nügümaã namaxēxũ naxcax na najumuxēgüxũ. Rü ngēmawena rü name nixĩ na wenaxärü noxrirüũ nügümaã namaxēxũ na tama Chataná nüxna ñnüxũcax na chixexügu najixēēäxũcax. ⁶Rü guxũma i nhaã ore i pemaã nüxũ chixxũ i âmāxchiga rü ätechiga rü tama wüxi i mu nixĩ i ngēma. Notürü pemaã nüxũ chixumare na nüxũ pecuāxũcax na namexũ i ngēmaãcü na penaxüxũ. ⁷Rü chatatama nagu charüxinü rü chierü name nixĩ ega chama chamaxũxürüũ namaxēgu i guxũma i duũxũgü. Notürü Tupana rü wüxichigü i duũxũna nanaxã i nacüma na nhuxäcü namaxēxũcax rü nhuxäcü nagu naxĩnüxũcax. Rü ngēmacax tama guxāma tawüxigu. ⁸Rü ngēma ngemāxgüxũ rü ngetegüxũ rü jutegüxũ rü namaã nüxũ chixu rü narümemaē nixĩ i chauxrüũ tama naxāmāx rü tama naxāte. ⁹Notürü ngēxguma wüxi i duũxũ taxucürüwa naxũneärü ngúchaũmaã naporagu, rü name nixĩ na naxāmaxũ rü exna naxätexũ. Erü narümemaē nixĩ i noxtacüma naxāmāx rü exna naxāte na tama jeücürü ngēmagu naxĩnüechaxũcax. ¹⁰Notürü jixema marü âmāxē rü ätexe, rü tümamaã nüxũ chixu na tama namexũ na tümatexũ na ítatáxũ. Rü ngēma mu rü tórü Coriarü mu nixĩ, rü tama choxrü nixĩ. ¹¹Notürü ngēxguma chi ngürüächi wüxi i ngexũ natexũ ítaxgu, rü name nixĩ i noxtacüma nangete rü exna wena natecax nataegu. Rü ngēxgumarüũ ta ja

jatü rü tama name i namaxũ ínatax.
 12Rü nhuxma rü choxũ nangẽxma i wüxi
 i ore i tümacax ja jíxema amaxẽ ngĩmaã
 i wüxi i nge i tama jaxõxcü. Rü ngẽma
 ore rü choxrütama nixĩ rü tama tórü
 Coriarü nixĩ. Rü ngẽxguma wüxi ja jatü
 ja õcü ngĩmaã amaxgu i wüxi i nge i
 tama jaxõxcü, rü tama name i ngĩxũ
 ínatax, ega ngĩma rü aixcuma namaã
 naxãtechaũgu. 13Rü ngẽxguma wüxi i
 nge i jaxõxcü ategu namaã ja wüxi ja
 jatü ja tama jaxõcü, rü tama name i
 ínatax ja jima ngĩte ega nüma ja jima
 jatü rü aixcuma ngĩmaã
 naxãmamaxchaũgu. 14Rü jima jatü ja tama
 jaxõcü, rü namax i jaxõxcügagu Tupana
 nüxũ nacuax. Rü ngẽma ngecü i tama
 jaxõxcü, rü ngĩte ja jaxõcügagu Tupana
 ngĩxũ nacuax. Erü ngẽxguma chi tama
 ngẽmaãcü jixĩgu, rü chi ngẽma
 naxãcügu rü duũxũgü i tama
 jaxõgũxũãcügürüü tá nixĩgü. Notürü i
 nhuxma ja naxãcügu rü marü Tupana
 tüxũ nacuax. 15Notürü ngẽxguma jima
 jatü ja tama jaxõcü rü namaxũ
 ínataxchaũgu rü jnoxtacüma ngĩxũ
 ínatá! Rü ngẽxgumarüü ega ngẽma
 ngecü i tama jaxõcü rü ngĩtexũ
 ínataxchaũgu, rü jnoxtacüma ngĩtexũ
 ínatá! Rü ngẽxguma ja jima jatü ja
 jaxõcü rü marü name ega wena
 naxãmamaxgu. Rü ngẽma ngecü i jaxõcü
 rü marü name ega wena naxãtegu. Erü
 Tupana pexũ nidexechi na meã
 pegiümaã pemaxẽxũcax. 16Rü ngẽmacax,
 Pa Ngecü i Tupanaãxũ Jaxõxcüx, rü
 ngẽxguma cute i tama jaxõxũ cuxũ
 ítáxchaũgu, rü narümemae nixĩ i tama
 cunachuxu, erü tama nüxũ cucuax ngoxi
 tá cunamaxẽẽ i ngẽma cute rü exna

tama. Rü cumax, Pa Jatü ja Jaxõxcüx,
 rü ngẽxguma cuxmax i tama jaxõxũ
 cuxũ ítáxchaũgu, rü narümemae nixĩ i
 tama cunachuxu, erü tama nüxũ cucuax
 ngoxi tá cunamaxẽẽ i ngẽma cuxmax rü
 exna tama. 17Rü nhuxma rü pemaã
 nüxũ chixu rü nüma ga Tupana rü
 wüxichigü ga duũxẽna nanaxã ga
 tümaärü cuax na tümaärü maxũmaã
 itacuáxũcax rü meã tanaxũxũcax i
 ngẽma puracü ga noxri tüxũ jexmaxũ ga
 taüta Tupana tümacax caxgu. Rü ngẽma
 nguxẽẽtae nixĩ i namaã chanangüexẽẽxũ
 i guxũma i jaxõgũxũ i wüxichigü ja
 tupaucawa ngẽxmagũxũ. 18Rü
 ngẽxguma Tupana naxcax caxgu i wüxi
 i duũxũ i marü Judëgürüü
 íwiechaxmüpexechiraũxũ, rü nüétama
 nixĩ ega ngẽmaãcüta jixĩgu. Rü
 ngẽxguma Tupana najaxgu i wüxi i
 duũxũ i tama íwiechaxmüpexechiraũxũ,
 rü nüétama nixĩ ega ngẽmaãcüta
 jixĩgu. 19Erü Tupanapexewa rü nüétama
 nixĩ ega wüxi i duũxũ rü
 ínawiechaxmüpexechiraũgu rü exna
 tama. Erü ngẽma Tupana aixcuma
 naxwaxexũ nixĩ na naga naxĩnũxũ i
 wüxichigü i duũxũ. 20Rü wüxichigü i
 duũxũ rü name nixĩ i nawatama
 napuracü ga jema puracü ga nüxũ
 jexmaxũ ga jexguma Tupana noxri
 naxcax caxgu. 21Rü jexguma wüxi ga
 coriarü duũxũ cuixjane Tupana cuxcax
 caxgu, rü tama name i ngẽmacax
 cuxoegaãẽ. Notürü ngẽxguma cuxũ
 natauxchagu na nüxna ícunguxuchixũ i
 ngẽma cori, rü marü name na
 ícunguxuchixũ. 22Rü cuma ga na
 cucoriãxjane cuxcax nacaxũ ga Tupana,
 rü name nixĩ i nüxna cucuaxãchi na

Cori ja Cristu pecaduwa cuxĩ
 ínguxuchixẽxũ. Rũ cuma ga na
 cungearũ coriãxjane cuxçax naçaxũ ga
 Tupana, rũ name nixĩ i nüxna
 cucuaxãchi na tórũ Cori ja Cristuarũ
 duũxũ cuiĩxũ i nhuxma na nüxũ
 cupuracũcax. ²³Tupana rũ marũ
 pexçax nataxe rũ poraãcũ nüxũ
 petatanũ. ¡Rũ ngẽmacax i nhuxma rũ
 tãũxũtãma naga pexĩnũe i ngẽma
 duũxũgũ i wenaxãrũ nhama i naãneãrũ
 chixexũwa pexũ gagũchaũxũ! ²⁴Rũ
 name nixĩ, Pa Chaueneẽgũx, i
 wũxichigũ i pema rũ meã
 Tupanapexewa penaxũama ga jema
 puracũ ga pexũ jexmaxũ ga jexguma
 noxri Tupana pexçax caxgu. ²⁵Rũ
 nhuxma rũ tá pemaã nüxũ chixu i
 nachiga i ngẽma duũxũgũ i ngemãxgũxũ
 rũ ngetegũxũ. Rũ tórũ Cori ja
 Ngechuchu rũ taxuũma i mu choxna
 naxã i ngẽmachiga. Notürũ tá pemaã
 nüxũ chixu i nhuxãcũ nagu charũxĩnũ i
 ngẽmachiga. Rũ ngẽma chorũ ore rũ
 aixcuma nixĩ erũ chama nixĩ i wũxi i
 duũxũ ga nüxũ changechaũtũmũĩãcũma
 choxũ najaxuxũ ga tórũ Cori. ²⁶Jixema
 na jaxõgũxũ rũ nhuxma rũ poraãcũ
 guxchaxũgũ tüxũ nangẽxma. Rũ
 ngẽmacax chauççax narũmemaẽ i tama
 nixãmax i ngẽma jatũgũ i ngemãxgũxũ.
²⁷Rũ ngẽxguma marũ cuxãmaxgu rũ
 tama name i ngĩxũ ícutax. Notürũ
 ngẽxguma cungetmaxgu rũ narũmemaẽ i
 tama cuxãmax. ²⁸Notürũ ngẽxguma
 cuxãmaxgu rũ tama pecadu nixĩ i
 ngẽma. Rũ ngẽxguma wũxi i paxũ ãtegu
 rũ tama pecadu nixĩ i ngẽma. Notürũ
 ngẽma ixãmaxgũxũ rũ ixãtegũxũ rũ tá
 najexera i norũ guxchaxũgũ i nhama i

naãnewa, rũ ngẽma nixĩ i tama
 chanaxwaxexũ na nüxũ nangupetũxũ.
²⁹Pa Chaueneẽgũx, pemaã nüxũ chixu
 rũ tama muxũ i ngunexũ tüxũ
 nangẽxma na naxũxũcax i Tupanaãrũ
 puracũ. Rũ ngẽmacax ja jixema
 ixãmaxgũxe rũ name nixĩ i meã
 tanaxũgũ i Tupanaãrũ puracũ nhama
 tangemãxgũxũrũ. ³⁰Rũ jixema
 ngexwaca jutanũgũxe rũ jixema peta
 ũgũxe rũ jixema itaxegũxe, rũ tama
 name i ngẽmacax Tupanaãrũ puracũ na
 ítangẽxgũxũ. ³¹Rũ jixema tüxũ
 nangẽxmaxẽ i tũmaãrũ ngẽmaxũgũ i
 nhama i naãnewa, rũ tama name i
 ngẽmacax Tupanaãrũ puracũxũ na
 ítangẽxgũxũ. Erũ nhama i naãne i
 nhuxma nüxũ idauxũ rũ paxa tá nagux.
³²Rũ tama chanaxwaxe na ãcũcax
 pexoegaãẽgũxũ. Rũ ngẽxguma wũxi i
 jatũ ngemãxgu, rũ Tupanaãrũ puracũgu
 narũxĩnũ rũ nagu narũxĩnũ na nhuxãcũ
 Tupanaãrũ ngũchaũ naxũxũ. ³³⁻³⁴Notürũ
 ngẽxguma naxãmaxgu i wũxi i jatũ, rũ
 nhama i naãneãrũ ngẽmaxũgu narũxĩnũ
 rũ nagu narũxĩnũ na nhuxãcũ namaxãrũ
 ngũchaũ naxũxũ. Rũ ngẽmaãcũ muxũgu
 narũxĩnũ. Rũ ngẽxgumarũũ ta nixĩ i
 ngexũgũ. Rũ ngẽma ngexũ i ngetexũ rũ
 Tupanaãrũ puracũgu narũxĩnũ, erũ
 marũ Tupanana nügũ naxã rũ guxũ i
 naxũnemaã rũ naãemaã naxçax namaxũ.
 Notürũ ngẽma ngexũ i ãtexũ rũ nhama i
 naãneãrũ ngẽmaxũgu narũxĩnũ, rũ nagu
 narũxĩnũ na nhuxãcũ natearũ ngũchaũ
 naxũxũ. ³⁵Rũ perũ mexũcax nixĩ i
 pemaã nüxũ chixuxũ i ngẽma, rũ tama
 pexna na chanachuxuxũcax nixĩ. Notürũ
 ngẽma nhacharũgũ na meã
 pemaxẽxũcax rũ aixcuma penaxũxũcax i

tórü Coriarü puracü. ³⁶Rü ngëxguma texé nagu rüxínügu na tūmaxācü rü marü na napaxū, rü tūmacax rü marü namexgu na naxātexū, rü marü name i ngixū taxūte ega aixcuma tūmacax rü ngēmaācü namemaēgu. Rü ngēma na naxātexū i tūmaxācü rü tama pecadu nixī. ³⁷Notürü ngëxguma wüxi i jatü nüxū nangëxmagu i norü pacü rü tama nanaxwaxegu na ngixū naxūtexū, rü marü name i ngēma rü ta. Erü naxmexwa ingëxma rü taxūicaxma texé tanachixewe na ngixū naxūtexūcax. ³⁸Rü ngēmawa nüxū tadau rü ngēma jatü i naxācü ngixū ütëxū rü mexū naxü. Rü ngēma jatü i tama naxācü ngixū ütëxū rü jexeraxū i mexū naxü. ³⁹Rü wüxi i nge i ātecü rü ngitemexëwa ingëxma i ngëxguma namaxūgu ja ngīte. Notürü ngëxguma najuxgu ja ngīte, rü marü name ega to i jatü i ngīma ngixū ngūchaūxūmaā naxātegu. Notürü inaxwaxe na wüxi ja jatü ja jaxōcūmaā naxātexū. ⁴⁰Notürü chauxcax rü jexeraācü chi itaāē i ngëxguma chi tau chima wena naxātegu. Rü ngēma ore rü choxrütama nixī, notürü nagu charūxīnü rü Tupanaāē i Üünëxūārü ore ta nixī.

**Tupananetachicūnaḡgūna
naxuaxūgūxū ga ōnachiga**

8 ¹Nhuxma rü tá pemaā nüxū chixu i nachiga i ngēma ōnagü i ngēma duūxūgü i tama Ngechuchuaxū jaxōgūxū norü tupananetachicūnaḡgūna uaxūgūxū. Rü aixcuma nixī i wüxichigü i jixema i meāma nüxū icuáxū i ngēmachiga. Notürü ngēma nüxū na icuáxūgagu rü

nhuxguacü rü jigü namaā ítarüta. Notürü ngēma na jigü ingechaūxū rü tūxū narūngūxēē na jexeraācü meā jaxōgūchigūxū. ²Rü ngëxguma chi texé nagu rüxínügu na ḡacūxū tacuáxū, rü name nixī i nüxna tacuaxāchi na ngëxguma rü ta tama aixcuma nüxū tacuáxū i guxūma i ngēma cuax i aixcuma ixixū. ³Notürü ngëxguma texé aixcuma Tupanaxū ngechaūgu, rü Tupana rü tūxū nacuax ja jixema. ⁴Rü ngēma na nangōxū i ngēma ōnagü i tupananetachicūnaḡgūna naxuaxūgūxū i duūxūgü, rü meāma nüxū tacuax na taxuwama namexū i ngēma tupananetachicūnaḡgü rü tama aixcuma Tupanaxūchi nixīgü. Erü wüxixicatama nixī ja aixcuma Tupana ixīcü, rü nataxuma ja naī. ⁵Rü togü nüxū ixugūgügu rü nangëxma i muxūchixū i tupanagü i dauxūguxū i naānewa rü nhama i naānewa. ⁶Notürü jixema nüxū tacuax na nangëxmaxū i wüxitama ja Tupana, rü jima nixī ja Tanatü ixīcü. Rü nüma ja Tanatü nixī i naxūāxū i guxūma i ḡacü i ngëxmaxū, rü naxcax nixī i imaxëxū i jixemax. Rü ngëxgumarūū ta nangëxma i wüxitama ja tórü Cori ja Ngechuchu ja Cristu. Rü jimagagu nixī na nangëxmaxū i guxūma, rü jimagagu nixī i tūxū nangëxmaxū i maxū. ⁷Notürü tama guxūma i jaxōgūxū nüxū nacuax na nangëxmaxū i wüxitama ja Tupana rü wüxitama ja tórü Cori. Rü nhuxre i nümagü ga ūpa rü nüxū najapue na nüxū jaxōgūāxū i ngēma tupananetachicūnaḡgü, rü nhuxma rü ta tama aixcuma nüxū nacuaxgü i ngēma mexū i Tupana nüxū naxwaxëxū.

Rū ngēmacax nixī i nhuxma i nagu naxīnūēxū na chixexū naxūgūxū i ngēxguma nangōxgūāgu i ngēma naxūnamachi i togū i duūxūgū norū tupanetachicūnaxāgūna uaxūgūxū na nūxū namaā jacuaxūūgūxūcax. ⁸Rū jixema nūxū tacuax na tama tacū rū namachi na ingōxūgagu jīxū na Tupana tūxū dexū. Rū tāūxūtāma jexera time i napexewa ega nangōxgūgu i ngēma namachi. Rū tāūxūtāma jexera tichixe i napexewa ega tama nangōxgūgu.

⁹Notūrū i pema i nūxū na pecuáxū na tama pecadu jīxū na nangōxū i ngēma namachi, rū pexuāēgū erū ngūrūāchi ngēma na pengōxūgagu chixexūgu tá penajixēē i ngēma peeneēgū i taūta aixcuma meā nūxū cuaxgūxū na tacū jīxū i Tupana nūxū naxwaxexū! ¹⁰Erū cuma na meā Tupanaxū cucuáxū, rū ngēxguma chi cunangōxgu i ngēma namachi i ngextá tupanetachicūnaxāgūxū íjacuaxūūgūxūwa, rū ngūrūāchi wūxi i cueneē i taūta meā Tupanaxū cuáxū tá cuxū nadau. Rū ngūrūāchi nūma rū tá ta nanangōx i ngēma namachi woo naāēwa nagu naxīnūgu na wūxi i chixexū jīxū na nangōxū i ngēma namachi. ¹¹Rū ngēmaācū i cuma na meā Tupanaxū cucuáxū, rū tá icujanatauxēē i ngēma cueneē i Cristu naxcax juxū i taūta meā Tupanaxū cuáxū. ¹²Rū ngēmacax i ngēxguma chixexūgu cunanguxēēxgu i ngēma cueneē i taūta meā Tupanaxū cuáxū, rū Cristumaā rū ta chixexū cuxū. ¹³Rū ngēmacax i ngēxguma ngēma namachi i changōxūgagu chixexūgu chananguxēēxgu i chaueneē, rū

narūmemaē nixī i noxtacūma taguma namachi changōx na tama pecadugu chananguxēēxūcax i ngēma chaueneē.

**Jíxema Cristu tūxū muxē na nūxū
tapuracūxūcax, rū tūxna naxū i
tūmaārū natanū**

9 ¹Rū pemaā nūxū chixu rū tórū Coritama nixī ja choxū jaxucū rū choxū mucū na norū puracū chaxūxūcax, rū ngēmacax taxuūma i duūxūgūmexēwa changēxma i nhuxmax. Rū chamatama chauetūmaā tórū Cori ja Ngechuchuxū chadau, rū ngēma puracū i nūxū chaxūxūgagu nixī i pejaxōgūxū i pemax. ²Rū woo togū i duūxūgū tama choxū cuaxgūchaūgu na tórū Cori choxū muxū, notūrū i pema rū meāma nūxū pecuax na nūma jīxū ga choxū namuxū. Jerū chauxūtawa nixī ga tórū Coriaxū pejaxōgūxū, rū ngēmawa nūxū pecuax na aixcuma jīxū na nūma choxū namuxū. ³⁻⁴Rū nhaā nixī i chorū dexa i namaā chanangāxūxū i ngēma duūxūgū i chauchiga idexagūxū:

“¿Exna tama inamexū na duūxūgū choxna naxāxū i chorū ōna rū chorū axexū naxcax i chorū puracū? ⁵¿Exna tama inamexū ta na wūxi i ngexū i jaxōxūmaā na chaxāmaxū na chajagaxūcax ngēxgumarūū na naxāmaxū i Pedru, rū naēneēgū ja tórū Cori, rū ngēma togū i jatūgū i Tupana imugūxū? ⁶¿Rū exna pema nagu perūxīnūēgu rū chama rū Barnabēxīcatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrūū? ⁷¿Tacū rū duūxū i churarawa ūxū i nūgūxūtama

naxūtanūxū i norū òna? ¿Rū tacū rü duūxū i ori itoxū i tama namūxū i norū o? ¿Rū tacū rü duūxū i carnerugūna dauxū i tama nagūnenixū ne ixaxūxū?” Ngēma nhacharūgū nūxū i ngēma duūxūgū i chauchiga idexagūxū. ⁸Rū nhuxma rü tāxūtāma nagu perūxīnūē na chorū orexīcatama jīxū i nhaā nūxū chixuxū! Erū Tupanaārū ore ga Muīsé ūmatūxūwa rü ta ngēma nhanagūrū.

⁹Erū ngēma ore rü nhanagūrū:

“¿Rū ngēma woca i aruchuarū
putēwewa puracūxū, rü
tāxūtāma cunawēxnagu na
tama jima aruchuwa
nachibūxūcax!”

nhanagūrū i ngēma ore. Rū nūxū tacuax na tama wocagūgu naxīnūxū ga Tupana ga jexguma jema nhaxgu. ¹⁰Notūrū pemaā nūxū chixu rü tagu nixī ga naxīnūxū ga jexguma jema nhaxgu ga Tupana. Rū tachiga nixī ga naxūmatūxū ga jema ore. Erū jīxema aruchunecū úxe rü jīxema norū oarū puxwa puracūxe, rü ngēxguma tapuracūejane rü tanaxwaxegū na ítananguxēēgūxū i ngēma norū o i tūxna ūxū. ¹¹Rū toma rü wūxi ja nanetūchire ja itatoxūnerū tixīgū ga jexguma pemaā nūxū tixuxgu ga Tupanaārū ore. ¿Rū nhuxma rü tama exna i pexcax namexū na toxna penaxāxū i tacū i toxū taxuxū? ¹²Rū ngēxguma ngēma togū i orearū uruūgū petanūwa najauxgūgu i ngēma nūxū taxuxū, rü maneca toma rü jexera name nixī i petanūwa tanajaxu i ngēma toxū taxuxū. Notūrū i toma rü tama ngēmaācū tanaxū. Erū toma rü guxū i guxchaxūmaā taporae na tama pexū tanaguxchaxēēxūcax na Cristuaxū

pejaxōgūxū. ¹³Pema nūxū pecuax rü guxūma i duūxūgū i tupauca ja taxūnewa puracūexū, rü ngēma òna ja jima tupaucawa ngēxmatūtama nangōxgū. Rū ngēma duūxūgū i tupaucagu Tupanacax naxūnagū daixū, rü nanade i nhuxre i ngēma namachi norū ngōxruū. ¹⁴Rū ngēxgumarū ta ja jīxema nūxū ixugūxe i ore i tūxū maxēxēxū, rü tōrū Cori nūxū nixu rü name nixī i tūmaārū puracūcax tanajaxu i tūmaārū natanū na ngēmamaā tamaxēxūcax. ¹⁵Notūrū i chama rü taguma ngēmaācū chanaxū. Rū nhuxma na pexcax chanaxūmatūxū i nhaā popera, rü tama tacū choxna pexāxūcax nixī. Erū ngēma na taguma texēxūtawa tacūcax íchaçaxū, rü wūxi i chorū taāē nixī. Rū narūmemaē chierū nixī na chajuxū naxūpa na texē choxna najaxuxū i nhaā taāē i choxū ngēxmaxū. ¹⁶Rū nhuxma na nūxū chixuxū i ngēma ore i tūxū maxēxēxū, rü taguma ngēmacax chaugū chicuaxū. Erū woetama ngēma nixī i chorū puracū ga Tupana choxna āxū, rü ngēmacax taxucūrūwama chanangexrū. Rū poraācū chi chachixexūgu i ngēxguma tau chima nūxū chixuxgu. ¹⁷Rū ngēxguma chi chaugagu chitama chanaxūxgu i ngēma puracū, rü nagu chí charūxīnū na choxū naxātanūxū. Notūrū ngēxguma Tupana choxū muxūācūma chanaxūxgu, rü chanaxūama erū woetama ngēma nixī i chorū puracū ga Tupana choxna āxū. ¹⁸¿Rū nhuxma rü tacū tá nixī i chorū natanū naxcax i ngēma puracū i chaxūxū? Rū dūcax, rü chorū natanū nixī i ngēma taāē i chajaxuxū i

ngēxguma ngetanüācūma nūxū
chixuxgu i ngēma ore i tūxū maxēxēēxū.
Rū ngēmaācū, rū woo Tupanapexewa
name na petanūwa chanaxuxū i chorū
natanū na ngēmamaā chamaxūxūcax,
notürü taguma chanaxū i ngēma. ¹⁹Rū
woo taxúxemexēwa changēxma i
chamax, notürü guxāxēxēwa chaugū
changēxmaxēē, na ngēmaācū jexeraācū
muxūma i duūxūgūxū
charüngūxēēxūcax na Cristuaxū
jaxōgūāxūcax. ²⁰Rū ngēxguma
Judégütanūwa changēxmagu, rū
Judéurūū chaugū chixixēē na ngēmaācū
nūxū charüngūxēēxūcax na Cristuaxū
jaxōgūāxūcax. Rū woo tama jema Muísé
ūmatūxū ga mugütūūwa changēxmagu,
notürü chajanguxēēāma i ngēma mugū
na ngēmaācū Cristuxūtawa
chanagagūxū i ngēma duūxūgū i
nhuxma rū ta nagu íxū i ngēma mugū ga
Muísé ūmatūxū. ²¹Rū ngēxguma
natanūwa changēxmagu i ngēma
duūxūgū i tama Judégū i xīgūxū, rū
ngēma duūxūgūrūū chaugū chixixēē na
ngēmaācū nūxū charüngūxēēxūcax na
Cristuaxū jaxōgūāxūcax. Notürü taguma
íchanangex i Tupanaārū mugū erū
guxūguma Cristuarū mugütūūwa
changēxma. ²²Rū ngēxguma natanūwa
changēxmagu i ngēma duūxūgū i tama
poraācū Cristuchigaxū caxgūxū, rū
chama rū ta ngēma duūxūgūrūū chaugū
chixixēē, na ngēmaācū nūxū
charüngūxēēxūcax na Cristuaxū
jaxōgūāxūcax. Rū ngēmaācū guxūma i
duūxūgūrūū chaugū chixixēē, rū
nagúxūraūācūma naxcax chadau na
ngēmaācū dūxwa Tupanaxūtawa
chanagagūxūcax i nhuxre i nūmagū.

²³Rū ngēmaācū nixī i chapuracūxū na
guxūwama nanguxūcax i ngēma ore i
tūxū maxēxēēxū. Erū chanaxwaxe na
chama rū ta choxū nangēmaxū i ngēma
maxū i taguma gúxū, naxrūū i guxūma i
ngēma duūxūgū i nūxū jaxōgūxū.

²⁴Pema rū meāma nūxū pecuax i wūxi i
inūca i nawa inhaāchixū rū muxūma
inaxūāchi, notürü wūxixicatama nixī i
ngēma nūxīra ínguxū rū najaxuxū i norū
āmare. Rū name nixī i meā na
pemaxēxū na Tupanaxūtawa
penajaxuxūcax i ngēma perū āmare.

²⁵Guxūma i ngēma duūxūgū i nūgū
mexēēxū naxcax i wūxi i inūca i nawa
inhaāchixū, rū meā nūgūna nadau na
taxūma nachixexēēxūcax i naxūne. Rū
ngēmaācū nanaxū na najauxgūāxūcax i
norū āmare i paxaāchixūmare íxīxū.
Notürü jixema na jaxōgūxū rū jūgūna
tadaugū na meā naxūgūxūcax rū meā
imaxēxūcax na najauxgūxūcax i tórū
āmare i taguma gúxū. ²⁶Rū ngēmacax i
chama rū tama nhama chauechitamare
chinhaxūrūū chixī, rū tama nhama tacū
i nūgū daixū i ngūrūanegumare
idagūxūrūū chixī. ²⁷Rū ngēmacax meā
chaugūna chadau i chaxunewa na
taxūma i chaxuneārū ngúchaū
chaxūxūcax. Erū tama chanaxwaxe i
mexūmaā togūxū
changuxēēchirexācūma choxū nataxu i
chorū āmare.

**Najaxucuxēgū na tama nūxū
jacuaxūūgūxūcax i
tupanenetachicūnaxāgū**

10 ¹Pa Chaueneēgūx, chanaxwaxe
i nūxna pecuaxāchie ga tacū
nūxū na ngupetūxū ga jema

nuxcūmaxūgūxū ga tórū oxigū ga Muísēwe rūxixū. Rū pema nūxū pecuax rū jexguma nawe naxīxgu rū wūxi ga caixanexū napexegu nixū rū najadūxū. Rū guxūma ga jema duūxūgū rū wūxigu Muísémaā natūūgu nixīxūtanū. Rū jexgumarūū ta Muísémaā nichoū nawa ga jema Taxtū ga Dauchiūxū. ²Rū guxūma ga jema duūxūgū rū jexguma wūxigu Muísémaā jema caixanexūpechitatūūgu jaxīxūtanūgu rū jema Taxtū ga Dauchiūxūwa jachoūgu, rū jemaācū nūgū nangoxēēgū na Muísēweama naxīxū. ³Rū jexgumarūū ta ga guxūma ga jema duūxūgū nanangōxgū ga jema pōū ga dauxūwa rūjixū. ⁴Rū guxūma ga jema duūxūgū najaxaxgū ga jema dexá ga Cristu nūxna āxū. Jerū Cristu rū jema duūxūgūxū ínixūmūcū ga jema ínaxīxūwa, rū nūxna nanaxā ga jema dexá ga jaxaxgūxū. ⁵Notūrū narūmumaē ga jema duūxūgū ga tama Tupanaārū ngúchaū ūgūxū. Rū jemacax ga jema duūxūgū rū jexma najue rū jema nawogū ga naxūnegū ga jema dauxchitawa ga taxúema íxāpataxūwa. ⁶Rū guxūma ga jema tórū oxigūxū ngupetūxū, rū jemaācū nūxū nangupetū na tórū cuaxruū jīxūcax, na tama naxruū tacū rū chixexūcaxama idaugūxūcax. ⁷Rū ngēmacax tama name i nūxū peicuaxūūgū i tacū rū tupanenetachicūnaxāgū, jexgumarūū ga nhuxre ga nūmagū naxūgūxūrūū. Erū Tupanaārū ore i ūmatūxūwa rū tórū oxigūchigaxū nixu rū nhanagūrū:

“Rū duūxūgū ínárūtogū na nachibūexūcax rū na naxaxegūxūcax, rū ngēmawena rū inachigū na íjajūxexūcax”,

nhanagūrū i ngēma ore. ⁸Rū tama name i jixema rū naī i ngemaā itape jexgumarūū ga nhuxre ga nūmagū naxūgūxūrūū. Rū jemacax wūxitama ga ngunexūgu rū najue ga 23,000. ⁹Rū tama name i nūxū taxū ja tórū Cori na nhuxācū jaxna tamaā naxīnūxū jexgumarūū ga nhuxre ga nūmagū naxūgūxūrūū. Rū jemacax nixī ga jema duūxūgūxū nangōxcuxū ga āxtapegū rū najuexū. ¹⁰Rū tama name i chixexū Tupanamaā peixugū jema nhuxre ga nuxcūmaxūgūxū ga tórū oxigūrūū. Rū jemacax ga Tupanaārū orearū ngerūū ga dauxūcūāx rū nanadai. ¹¹Rū guxūma ga jema tórū oxigūxū ngupetūxū, rū nhuxma na jangaicaxū na nagúxū i naāne rū tórū cuaxruū nixī. Rū naxūmatū na ngēmawa nūxū icuáxūcax na nhuxācū Tupana naxwaxexū na imaxēxū i jixema i nhamaūcūū na imaxēxū. ¹²Rū ngēmacax ja jīxema tūgūgu rūxīnūxē na taporaxū i Tupanapexewa, rū name nixī na meā tūgūna tadauxū na tama chixexūgu tanguxūcax. ¹³Rū nataxuma i tacū rū ngúchaū i chixexū i taxucūrūwama namaā peporaexū. Rū Tupana ja aixcuma janguxēēcū i ngēma tamaā inaxunetaxū, rū tá pexū narūngūxēē na tama pexū naporamaēxūcax i ngēma ngúchaūgū. Erū ngēxguma pexcax ínanguxgu i ngēma ngúchaūgū, rū Tupana tá pexū naporaxēē na naxchaxwa peixīgachixūcax na tama pexū naporamaēxūcax. ¹⁴Rū ngēmacax, Pa Chaueneēgū ja Pexū Changechaūgūxe, ꞑrū nūxna peixīgachi i guxūma i tupanenetachicūnaxāgū na tama nūxū peicuaxūūgūxūcax! ¹⁵Pemaā

nũxũ chixu i ngẽma ore, erũ chauxcax rũ duũxũgũ i nũxũ cuáxũ peixĩgũ. Rũ pema tátama nagu perũxĩniũe i ngẽma pemaã nũxũ chixuxũ. ¹⁶Rũ ngẽxguma õna i iũinexũcax ingutaqexegũgu, rũ jaxaxgũgu ja jima wĩũ ja iũinecu rũ moxẽ naxcax ixãgũgu, rũ ngẽmaãcũ jigũ tangoxẽẽ na Cristu ja taxcax nagũ ibacũwe rũxĩxũ. Rũ ngẽxguma nangõxgũgu i ngẽma põũ i ibucuxũ, rũ ngẽmaãcũ jigũ tangoxẽẽ na Cristu ja taxcax naxũne ixãcũwe rũxĩxũ. ¹⁷Rũ woo na imuxũ i jixema, notũrũ wũxitama i põũ tangõxgũ. Rũ ngẽmaãcũ nixĩ i wũxitama ixĩgũxũ erũ wũxiwetama tarũxĩ. ¹⁸¶Rũ dũcax i ngẽma Judẽgũ i nangõxgũxũ i ngẽma naxũnamachi i Tupanacax naðaixũ! Rũ ngẽxguma wũxigu nũgũmaã nangõxgũãgu, rũ guxũma i ngẽma nangõxgũxũ rũ ngẽmaãcũ nũgũ nangoxẽẽ na wũxigu Tupanawe naxĩxũ. ¹⁹Rũ nhuxma na ngẽma nhachaxũ, rũ tama chanaxwaxe i nagu perũxĩniũe na naxũinexũ i ngẽma namachi i ngẽma duũxũgũ i tama jaxõgũxũ norũ tupananetachicũnaçãcax ðaixũ. Rũ tama chanaxwaxe i nagu perũxĩniũe na ðacũwa namexũ i ngẽma norũ tupananetachicũnaçãgũ, erũ nangearu maxũãx. ²⁰Notũrũ pemaã nũxũ chixu rũ ngẽxguma ngẽma duũxũgũ i tama Tupanaxũ cuaxgũxũ, norũ tupananetachicũnaçãcax nadaiãgu i ðacũ rũ naxũna, rũ tama Tupanacax nixĩ i nadaiãxũ, notũrũ ngoxogũcax nixĩ i nadaiãxũ. Rũ tama chanaxwaxe i ngoxogũtanũxũxũ pegũ peixĩgũxẽẽ. ²¹Rũ pema na pejaxaxgũxũ ja jima wĩũ ja tórũ Corixũ namaã peicuaxũũgũcũ rũ

taxucũrũwama namaã pexãmũcũ i ngẽma duũxũgũ i Chatanáwe rũxĩxũ. Rũ pema na tórũ Coriarũ mechawa penangõxũ i ngẽma õna i nũxũ namaã peicuaxũũgũxũ rũ taxucũrũwama ngẽma duũxũgũ i Chatanáwe rũxĩxũãrũ mechawa pejachibũe. ²²¿Rũ nhuxũ nhapegũxũ i nhuxmax? ¿Exna penanuxẽẽchaũ ja tórũ Cori? ¿Exna pexcax rũ nũxũ tarũporamaẽgũ i jixemax?

**Cristu rũ marũ tũxũ ñanguxũxẽẽ
nawa i Muĩsẽaru mugũ,
notũrũ taxucũrũwama ngẽmacax
nhuxãcũmare taeneẽgũpexewa
tamaxẽ**

²³Pema rũ nhaperũgũgũ:

“Marũ name na tanaxũxũ i ðacũ i tanaxwaxegũxũ”, nhaperũgũgũ. Rũ aixcuma nixĩ i ngẽma, notũrũ tama tũxũ name i guxũma i ngẽma ixũxchaũxũ. Rũ ngẽmaãcũ Cristu tũxũ ñanguxũxẽẽ na naxũũcax i ngẽma inaxwaxexũ, notũrũ tama guxũma i ngẽma ixũxũ tũxũ narũngũxẽẽ na jexeraãcũ meã jaxõgũamachigũxũcax. ²⁴Rũ tama name nixĩ i tóxrũtama mexũcax tadaugũ, notũrũ name nixĩ i togũaru mexũcax na idaugũxũ. ²⁵Rũ marũ name i penangõx i nagũxũraũxũ i namachi i namaã nataxegũxũ. Rũ taxũcaxma tũxçũũ naxcax pexoegaãẽ rũ nũxna peca na ngextã ne naxũxũ i ngẽma namachi. ²⁶Erũ nhama i naãne rũ guxũma i nawa ngẽxmaxũ, rũ tórũ Coriarũ nixĩ. ²⁷Rũ ngẽxguma chi wũxi i duũxũ i tama jaxõxũ pexna uxgu na naxũtawa pejachibũexũcax, rũ chi ngẽma pexĩxgu, rũ marũ name i penangõx i guxũma i

ōna i pepexegu jaxiūchixiū. Rū taxuūcaxma tūxcūi naxcax pexoegaē rū nūxna peca na ngextá ne naxūi i ngēma namachi i pemaā nangóxi.

²⁸Notürü ngürüāchi wūxie tá pemaā nūxi tixu rū nhatarūgi:

“Nhaā namachi rū tupananchicūnācax jamaxgūi i naxūnawa ne ūxi nixi”, nhatarūgi. Rū ngēxguma i pema rū tama name na penangóxi i ngēma namachi na tama chixexūgu tūxi penguxēxi cax ja jixema pemaā nūxi ixuxe, rū tama ngēmacax taxoegaēxi cax i tūmax.

²⁹Rū tama pechiga nixi i chidexaxū i ngēxguma:

“Na tama taxoegaēxi cax”, nhachagu. Notürü jixema pemaā nūxi ixuchega nixi i chidexaxū. Notürü bexmana ngürüāchi wūxi i jaxóxi tá cuxna naca rū nhanagürü tá cuxi:

“¿Tūxcūi i togü naxcax oegaēxi gagu choxna cunachuxu na tama chanaxūxi i tacü i chanaxwaxexū? ³⁰Rū ngēxguma chi Tupanana moxē chaxāxgu naxcax i ngēma ōna i changóxi, ¿rū tūxcūi i ngēma ōnacax choxi cuixu?”

nhanagürü. ³¹Dūcax, pemaā nūxi chixu rū name nixi i guxi i ngēma pexiūmaā Tupanaxū petaxē. Rū ngēxguma tacü pengōxgūgu rū exna tacü peixaxgūgu rū exna tacü i to pexūgūgu, rū name nixi i guxi i ngēmamaā Tupanaxū petaxē. ³²Rū tama name i penaxū i tacü i togūxi chixexūgu jixēxi, rū bai i Judéguxi, rū bai i ngēma duxiūgi i tama Judégu xiūxi, rū bai i ngēma jaxōgūxi.

³³Rū chama chanaxwaxe i guxi i chaxūxiwa na guxi i togüaru

mexūcax chadauxū. Rū tama choxrütama mexūcax nixi i chadauxū, notürü togüaru mexūcax nixi i chadauxū na nūmagü rū ta jaxōgūxi cax rū najauxgūxi cax i maxū i taguma gūxi.

11 ¹Rū name nixi i nagu pexi i chaciūma ngēxgumarūi i chama na Cristucūmagu chixūxi.

Nhuxācū meā nūgūmaā inacuaxgū i ngexūgi i ngutaquexēgiwa

²Pa Chaueneēgūx, pemaā chataāē erü guxiūguma chagu perūxiñē rū nagu pexi ga jema nguxētae ga pexi changūxi.

³Notürü chanaxwaxe i nūxi pecuax na Cristu rū wūchigi i jatüeru na jixū. Rū jatūxi rū naxmaxeru nixiū ngēxgumarūi ja Tupana rū Cristueru na jixū. ⁴Rū ngēmacax i ngēxguma wūxi ja jatü ngutaquexewa jumuxēgu rū exna Tupanaāri orexi jaxuxgu, rū tama íngaxūchipatexegu, rū ngēma rū wūxi i chixexū nixi i Cristupexewa naxūxi.

⁵Notürü ngēxguma chi wūxi i ngecü ngutaquexewa jumuxēgu rū exna Tupanaāri orexi jaxuxgu, rū chi tama ngūgu natüerugu, rū ngēma rū wūxi i chixexū nixi i ngētepexewa naxūxi. Rū nhama ngūgu jadüerūxi i jixi. ⁶Erü ngēxguma chi tama ngūgu natüeruchaūgu, rū narūmemaē nixi i noxtaciūma ngūgu ibaxeru. Notürü ngēxguma chi wūxi i ngürü āne jixiūgi i ngēma na ngūgu nabaxeruxū rū exna ngūgu jadüeruxū, rū narūmemaē nixi i ngūgu itüeru. ⁷Notürü jatūgu rū tama name na nūgü natüerugūxi. Jerü ga Tupana rū nūgüraūciū nanaxū ga jatü rū Tupanachipeta nixi. Rū jima jatüwa nixi i

nangóxũ na nhuxãcü namexêchixũ ja Tupana. Rũ ngẽma ngecüwa nixĩ i nangóxũ na nhuxãcü namexũ ja jatũ. ⁸Jerũ jexguma noxri Tupana naxũxgu ga jatũ, rũ tama ngecüwa nixĩ ga naxũãxũ. Rũ ngĩma waxi nixĩ ga jatũwa ngĩxũ naxũxũ. ⁹Rũ jatũcax nixĩ ga Tupana ngĩxũ xũ ga ngecü, rũ tama ngecücax nixĩ ga Tupana naxũxũ ga jatũ. ¹⁰Rũ ngẽmacax name nixĩ i ngĩgũ itũeru na duũxũgũpexewa rũ Tupanaãrũ orearũ ngeruũgũ i dauxũcũãxgũpexewa nangóxũcax na ngĩtemexewa nangẽxmaxũ. ¹¹Notũrũ Tupanapexewa rũ taxuũma nixĩ ja jatũ ega natauxgu i ngecü. Rũ ngẽxgumarũ ta i ngecü rũ taxuũma ijixĩ ega natauxguma ja jatũ. ¹²Jerũ jexguma noxri Tupana ngĩxũ xũga ga ngecü, rũ jatũwa nixĩ ga ngĩxũ naxũxũ. Rũ ngẽxgumarũ ta ja jatũ rũ ngecüwa nixĩ i nabuxũ. Notũrũ Tupana nixĩ ja naxũcü i guxũma i duũxũgũ. ¹³Rũ pematama tá penangũ rũ ngoxi name na wũxi i ngecü rũ tama ngĩgũ natũeruãcũma najumuxẽxũ. ¹⁴Rũ woetama tórũ bucũma nixĩ i nũxũ na icuáxũ na wũxi i ãne jiĩxũ na nũgũ namãxjaexẽxũ i wũxi i jatũxũ. ¹⁵Notũrũ ngecücax rũ wũxi i mexêchixũ nixĩ na namãxjaexũ. Erũ Tupana rũ ngĩxna nanaxã i ngĩjãe na ngẽmamaã ngĩgũ natũeruxũcax. ¹⁶Notũrũ ngẽxguma chi texẽ ngẽmachiga tũgũ choxũgagũgu, rũ name nixĩ i nũxũ tacuãx na ngẽmatama jiĩxũ i tacũma rũ nacũma i guxũma i jaxõgũxũ i guxũnema ja tupaucagũwa.

**Duũxũgũ rũ chixri namaã
inacuãxgũ ga Coriarũ õna i ùunexũ**

¹⁷Rũ nhuxma i nhaã popera i pexcax chaxũmatũxũwa rũ pemaã nũxũ chixu

rũ nangẽxma i wũxi i pecũma i chixexũ i tama namaã chataãẽxũ. Erũ chauxcax i ngẽma perũ ngutaquexegũ rũ pexũ nachixexẽẽ, rũ tama aixcuma perũ meruũgũ nixĩgũ. ¹⁸Erũ duũxũgũ chamaã nũxũ nixugũgũ rũ ngẽxguma tórũ Coricax pengutaquexegũxgu rũ pegũ peitoje. Rũ ngãxũgũ chajaxõ na aixcuma jiĩxũ i ngẽma nũxũ jaxugũgũxũ. ¹⁹Chama rũ nũxũ chacuãx na aixcuma woe tátama jiĩxũ i pegũ peitojexũ na ngẽmawa nũxũ icuáxũcax na texégũ tiĩxũ ja jĩxema aixcuma Cristuarũ duũxũgũ ixĩgũxe. ²⁰Rũ ngẽma pegũ na peitojexũgagu nixĩ na tama aixcuma tórũ Corixũ peicuãxũũgũãcũma jiĩxũ i penangóxũ i tórũ Coriarũ õna i ùunexũ i ngẽxguma pengutaquexegũxũgũ. ²¹Erũ ngẽxguma penangõxgu i ngẽma õna i ùunexũ rũ wũxichigũ rũ penhuxãẽgũ na pexira na penajaxuxũcax i ngẽma õna. Rũ joxni i ngẽma togũ rũ ngẽxma nataijãe, rũ togũ rũ najaxxgũ ja wĩ nhuxmata nangãxẽ. ²²¿Exna pengechiũgũ ecax tama ngẽma pechibũexũ rũ pexaxegũxũ? ¿Tũxcũũ nũxũ pexoe i ngẽma togũ i jaxõgũxũ i penaxãneẽxẽẽ i ngẽma jaxõgũxũ i ngearũ ngẽmaxũãxgũxũ? ¿Rũ tacũxũ tá pemaã chixu i nhuxmax? ¿Pexcax rũ tá pemaã chataãẽxũ? Dũcax, pemaã nũxũ chixu rũ tama pemaã chataãẽ naxcax i ngẽma pexũgũxũ.

Tórũ Coriarũ õna i ùunexũchiga

²³Jerũ tórũ Corixũtawatama chanajaxu ga jema nguxẽẽtae ga pemaã nũxũ chixuxũ. Rũ jexguma bexma tórũ Cori ga Ngechuchuxũ inaxuaxũgu, rũ jematama chũtaxũgu rũ tórũ Cori

nanajaxu ga wüxi ga põü. ²⁴Rü Tupanana moxê naxçax naxã, rü jemawena rü inanabücu, rü nhanagürü:

“Nhaã nixî i chaxune i pexçax ichaxãxüchiga. ¡Rü penangó i nhaã põü na ngêmaäcü peãêwa choxna pecuaxãchiexüçax!” nhanagürü. ²⁵Rü jexgumarüü ta ga chibüwena rü Ngechuchu nanajaxu ga wüxi ga copu ga wüchiümaã äacuxü, rü nhanagürü:

“Rü daa wüü rü wüxi i cuaxruü nixî na ngexwacax Tupana duüxügümaã ixunetaxü i maxü i taguma gúxüchiga. Rü chaugü ja pexçax ibacümaã nixî i Tupana pexü nüxü cuaxêxü i ngêmachiga. Rü ngêxguma nhuxguacü daa wüü peixaxgügu rü nhuxma chama na chanaxüxüüü tá penaxü na peãêwa choxna pecuaxãchiexüçax”, nhanagürü ga Ngechuchu. ²⁶Rü guxügüma i ngêxguma penangõxgu i nhaã põü rü pejaxaxgügu ja daa wüü rü ngêmawa tá duüxügüxü nüxü peicuaxêê na nhuxäcü tórü pecaduçax najuxü ga tórü Cori. Rü ngêmaäcü tá penaxü nhuxmatáta wena nataegu i nümax.

Nhuxäcü nixî i namexü na nangóxü i tórü Coriarü õna i üünexü

²⁷Rü ngêxguma chi ngexerüxe ja duüxê rü tachixearü maxüãxäcüma tanangõxgu i nhaã põü rü exna tajaxaüxgu ja daa wüü, rü wüxi i chixexü taxü namaã i naxüne rü nagü ja tórü Cori. ²⁸Rü ngêmacaçax naxüpa na tanangóxü i ngêma põü rü na tajaxaxüxü ja jima wüü, rü name nixî i wüxichigü meã tügü tangugü ngoxi nataxuma i taçü rü chixexü i tümaärü maxüwa. ²⁹Erü ngêxguma chi

tanangõxgu rü tajaxaüxgu rü tama meã nagu tarixünügu na tórü Corixünechiga jixü i ngêma, rü tügütama pocuwa taga i ngêxguma tanangõxgu rü tajaxaüxgu.

³⁰Rü ngêmacaçax nixî i muxüchixe i petanüwa rü peiðaaweexü rü peturaexü, rü nhuxre i togü rü marü najuexü.

³¹Notürü ngêxguma chi jigütama ingugügu naxüpa na nangóxü i ngêma õna, rü tórü Cori rü taxuüçax chima tüxü napocue. ³²Notürü ngêxguma tórü Cori nhama i tórü maxüwa tüxü pocugu, rü ngêmaäcü tüxü inajarüwexächixêê na tama jixcüra naãneärü guxgu tüxü napocuxüçax wüxigu namaã i ngêma duüxügü i tama jaxögüxü. ³³Rü ngêmacaçax, Pa Chaueneëgüx, rü ngêxguma pengutaquexegügu na penangóxüçax i ngêma õna i üünexü, rü name nixî i pegü ípenanguxêê na guxãma wüxigu meã penangóxüçax.

³⁴Rü ngêxguma chi texé tajaxgu, rü name nixî i tümapatawatama tachibü na tama Tupana pexü pocuexüçax naxçax na chixexü pexüexü i perü ngutaquexegüwa. Rü ngêma to i guxchaxügü i pexü ngêxmaxü, rü chama tá chanamexêê i ngêxguma petanüwa chaxüxgu.

Ngêma nacümagü i Tupanaã i Üünexü tüxna äxüchiga

12 ¹Pa Chaueneëgüx, chanaxwaxe i nüxü pecuax na nhuxäcü jixü i ngêma nacümagü rü ngêma cuax i Tupanaã i Üünexü tüxna äxü. Rü ngêmachiga nixî i pemaã nüxü chixuxchaüxü i nhuxmax. ²Rü pema meãma nüxü pecuax ga jexguma taüta Cristuaxü pejaxögügu, rü pegü nüxna

pexãgũ ga tupanenetachicũnaãxãgũ ga ingeáxũ. ³Rũ ngẽmacãx i nhuxma rũ chanaxwãxe i meã nũxũ pecuãx rũ ngẽxguma Tupanaãe i Üünexũ texéxũ idexaxêegu, rũ taxucürũwama nhatarũgũ:

“Rũ wũxi ja chixecũ nixĩ ja Ngechuchu”, nhatarũgũ. Rũ ngẽxgumarũũ ta, rũ taxucürũwama texé nhatarũgũ:

“Ngechuchu rũ tórũ Cori nixĩ”, nhatarũgũ ega tama Tupanaãe i Üünexũ tũxũ muxgu na ngẽmaãcü tidexaxũcãx. ⁴Rũ namu nixĩ i nacũmagũ i duũxũgũ jaxuxũ, notürũ ngẽma tũxna naxãxũ rũ wũxitama nixĩ. Rũ nũma nixĩ i Tupanaãe i Üünexũ. ⁵Nangẽxma i nagúxũraũxũ i nacũma na nhuxãcü tórũ Coricãx ipuracũexũ, notürũ wũxitama nixĩ ja tórũ Cori ja tũxũ mucũ na nũxũ ipuracũexũcãx. ⁶Rũ Tupanaãrũ pora rũ nagúxũraũãcü tawa napuracũ, notürũ wũxitama nixĩ ja Tupana ja guxũma ücü i guxũ i duũxũgũwa. ⁷Rũ Tupana rũ wũxichigũ i duũxũna nanaxã i cuãxrũ i nawa nũxũ icuãxũ na Naãe i Üünexũ tawa ngẽxmaxũ. Rũ ngẽmaãcü nanaxũ ja Tupana na guxũma i jaxögũxũxũ nangũxêexũcãx. ⁸Rũ Tupana rũ Naãe i Üünexũxũ namu na nũma tũxna naxããxũcãx i cuãx na tũmãxê rũ nũxũ tacuãxũcãx na meã toguãxũ taxucyxêxũcãx. Rũ ngẽmatama Naãe i Üünexũ toguãxna nanaxã i cuãx na meã nũxũ tacuãxũcãx na nhuxãcü meã tangúexêetaexũ. ⁹Rũ tũmaxê, rũ ngẽmatama Naãe i Üünexũ tũxũ nanatauxchaxêe na meã tajaxõxũcãx. Rũ togue rũ tũxna nanaxã i pora na ngẽmamaã naxcãx tajataanexêexũcãx i

ngẽma idãaweexũ. ¹⁰Rũ togue rũ tũxna nanaxã i pora na tanaxũxũcãx i tacũ rũ mexũ i Tupanaãrũ poramaã üxũ. Rũ togue rũ tũxna nanaxã i cuãx na nũxũ tixuxũcãx i Tupanaãrũ ore. Rũ togue rũ tũxna nanaxã i cuãx na nũxũ tacuãxũcãx i tacũ jĩixũ i ngoxogũarũ ixĩxũ rũ tacũ jĩixũ i Tupanaãe i Üünexũãrũ ixĩxũ. Rũ togue rũ tũxna nanaxã i cuãx na ngẽma tama nũxũ tacuãxũ i nagawa tidexaxũcãx. Rũ togue rũ tũxna nanaxã i cuãx na tanangoxêexũcãx na tacũchiga jĩixũ na tidexaxũ ja jĩxema to i nagawa idexãxe. ¹¹Rũ guxũma i ngẽma rũ Tupanaãe i Üünexũtama nixĩ i naxũxũ. Rũ nũma nixĩ i wũxichigũ i duũxũna naxããxũ i ngẽma cuãx i nũma nanaxwãxexũ na nũxna naxããxũ.

Guxãma i jixema i jaxögũxũ rũ wũxitama i duũxũrũũ tixĩgũ

¹²Rũ wũxi i naxũne rũ woo nũxũ nangẽxmagu i naeru rũ nachacũügũ rũ naparagũ rũ muxũma i to i norũ ngẽmaxũgũ, notürũ wũxitama i naxũne nixĩ. Rũ ngẽxgumarũũtama nixĩ i guxũma i Cristuarũ duũxũgũ na wũxitama i naxũnerũũtama jixĩgũxũ. ¹³Tupanaãe i Üünexũ rũ wũxitama nixĩ. Rũ jexguma fĩbaiũgu ga jixema, rũ wũxitama i naxũnerũũ tũxũ nixĩgũxêe. Rũ woo Judéugũ na ixĩgũxũ, rũ exna duũxũgũ i tama Judéugũ na ixĩgũxũ, rũ exna duũxũgũ i tacũ rũ corimexêwa ngẽxmagũxũ na ixĩgũxũ, rũ exna duũxũgũ i taxúxemexêwa ngẽxmagũxũ na ixĩgũxũ, notürũ wũxitama i naxũnerũũ tũxũ nixĩgũxêe i nũma i Naãe i Üünexũ. Rũ guxãma i jixema rũ

aixcuma marü tixna nangu i ngêma Naãe i Üünexũ. ¹⁴Wüxi i naxũne rü tama nüxĩcatama nixĩ, notürü nüxũ nangêxma i naëru rü nachacüügü rü naparagü. Rü ngêmaãcü muxũgu nixũje. ¹⁵Rü ngêxguma chi wüxi ja nacutü nhaxgu:

“Rü nhuxma na tama naxmex chiĩxũ, rü ngêmacax tama ngêma naxũnewa changêxma”, nhaxgu, rü tama ngêmacax nüxũ narüxo na naxũneãrü jixũ. ¹⁶Rü ngêxguma chi wüxi ja nachinü nhaxgu:

“Rü nhuxma na tama naxëtü chiĩxũ, rü ngêmacax tama naxũnewa changêxma”, nhaxgu, rü tama ngêmacax nüxũ narüxo na naxũneãrü jixũ. ¹⁷Erü ngêxguma chi guxũma i naxũne rü naxëtü jixĩgu, ¿rü tacümaã chi i nüxũ ixĩnüëxũ? Rü ngêxguma chi guxũma i naxũne rü naxmachixê jixĩgu, ¿rü tacümaã chi i nüxũ iwãxixũ?

¹⁸Notürü Tupana ga naxücü ga taxüne, rü ngexta nûma ínanaxwaxexũgu nanaxü ga taeru rü tachacüügü rü taparagü i norü guxũma i taxüne. ¹⁹Rü ngêxguma chi guxũma i taxüne rü taeruxicatama jixĩgu, rü ¿ngêxũ chi jixũ i taxüne ixĩxũ? ²⁰Rü woo nangêxma i taeru rü tachacüügü rü taparagü, notürü wüxitama nixĩ i taxüne. ²¹Rü taxetü rü taxucürüwa taxmexũ nhanagürü:

“Chama rü tama chacuxwaxe”, nhanagürü. Rü ngêxgumarüü ta i taeru rü taxucürüwa tacutügüxũ nhanagürü:

“Chama rü tama chapexwaxe”, nhanagürü. ²²Notürü ngêma jexeraãcü ãücümaxũ i taxünewa, rü ngêma nixĩ i jexera nanaxwaxexũ i taxüne. ²³Rü ngêma taxünewa jexeraãcü naxçax

ixãnexũ, rü ngêma nixĩ i jexera meã ixüxchiruxũ. Rü ngêma taxünewa ngêxmaxũ i tama ínaxwaxexũ na nangexchiruxũ, rü ngêma nixĩ i jexera meã idüxüxũ. ²⁴Notürü tama ngêmaãcü tanaxü namaã i ngêma taxünewa ngêxmaxũ i guxãxũma iwéxũ. Rü ngêmaãcü Tupana nanaxü i taxüne, na jexeraãcü nüxna idauxüçax i ngêma jexera naxçax ixãnexũ i taxünewa. ²⁵Rü ngêmaãcü Tupana nanaxü i taxüne na wüxichigü i ngêma taxünewa ngêxmaxũ rü nüxna nadauxüçax i natanüxũ, rü guxũma meã nügümaã na napuracüëxüçax. ²⁶Rü ngêxguma chi wüxi i ngêma taxünewa ngêxmaxũ tacü nüxũ nguxgux, rü guxũma i ngêma togü i natanüxügü rü ta nüxũ nangux. Rü ngêxguma chi wüxi i ngêma taxünewa ngêxmaxũ tacümaã taãëxgu, rü guxũma i ngêma togü i natanüxügü rü ta nataãê. ²⁷Rü nhuxma i pema rü Cristüxüne peixĩgu. Rü wüxichigü i pema rü ngêma naxükena pexügü. ²⁸Rü ngêmacax ja Tupana rü norü düüxügü i jaxögüxũtanüwa tüxü naxuneta ja nhuxre na norü puracüwa tüxü namügüxüçax. Rü tüxü naxuneta ja toguãx na nüxũ tixuxüçax i norü ore. Rü tüxü naxuneta ja toguãx na düüxügüxũ tangüexêëxüçax i norü ore, rü toguãx na tanaxüxüçax i mexügü i taxügü i Tupanaãrü poramaã üxũ. Rü tüxü naxuneta ja toguãx na tanameëxêëxüçax i idaaweexũ, rü toguãx na togüxü tarüngüxêëgüxüçax, rü toguãx na jaxögüxũãrü ãëxgacügü na tixügüxüçax. Rü tüxü naxuneta ja toguãx na ngêma tûma tama nüxũ tacuáxü i nagawa na tidexagüxüçax. ²⁹Rü tama guxãma rü

Tupana tūxū imugūxe tixīgū, rū tama guxāma Tupanaārū orearū uruū tixīgū. Rū tama guxāma norū orewa ngxēētaegūxe tixīgū, rū tama guxāma nūxū tacuax na tanaxūxū i mexūgū i taxūgū i Tupanaārū poramaā ūxū. ³⁰Rū tama guxāma nūxū tacuax na tanameēxēxū i duūxūgū i idaaweexū. Rū tama guxāma nūxū tacuax na nawa tidexagūxū i wūxi i naga i tama nūxū tacuáxū. Rū tama guxāma nūxū tacuax na tanangoxēēxū na tacūchiga jadexaxū i ngēma duūxūgū i tama nūxū nacuáxū i nagawa idexaxū. ³¹Rū naxcax pedax na Tupanaxūtawa penajaxuxūcax i ngēma cuax i rümemaēxū!

Jigū na ingechaūgūxūchiga

Notürü i nhuxma rū tá pexū changūexē i tacū nixī i guxūma i ngēma pemaā nūxū chixuxūārū jexera rümemaēxū.

13 ¹Rū woo ngēma chama tama nūxū chacuáxū i nagawa chidexagu, rū woo Tupanaārū orearū ngeruūgū i dauxūcūāxgawa chidexagu, notürü wūxi i tacū i āgaxūrūmare chixī ega tama chamūcūxū changechaūgu. ²Rū woo nūxū chacuaxgu na meā duūxūgūmaā nūxū chixuxū i Tupanaārū ore, rū woo nūxū chacuaxgu i guxūma i tacū i ēxūguxū i Tupanachiga, rū woo chamaā nanguxūgu na ngēma chorū ōmaā chajaxīgachixēēxū ja m̄xpúnegū, notürü taxuwama chame ega tama chamūcūxū changechaūgu. ³Rū woo ngēma duūxūgū i ngearū dīeruāxgūxūxū chajanuxgu i guxūma i tacū i choxū ngēxmaxū, rū woo Tupanaārū orecax chaugū ichaxāxgu na ūxūwa choxū

jagugūxūcax, rū taxuwama choxū name i ngēma ega tama chamūcūxū changechaūgu. ⁴Rū jīxema tūmamūcūxū ngechaūxē, rū jaxna namaā taxīnū, rū namaā tamecūma. Rū tama tixāūxāchiwaxe, rū tama tūgū ítarūta, rū tama tūgū ticuaxūū. ⁵Rū jīxema tūmamūcūxū ngechaūxē, rū tama taguxchigawaxe, rū tama tūgūguxicatama tarūxīnū, rū tama tanuxwaxe, rū tama nagu tarūxīnūēcha ega texē chixexū tūmamaā ūxgu. ⁶Rū tama namaā tataāē i chixexūgū, notürü namaā tataāē i ngēma ore i aixcuma ixīxū. ⁷Rū jīxema aixcuma tūmamūcūxū ngechaūxē, rū jaxna namaā taxīnū, rū guxūguma nūxū tajaxō, rū guxūguma mexūgu namaā tarūxīnū, rū taguma nachi taxai woo tacū tūmamaā naxūxgu i tūmamūcū. ⁸Rū ngēma jigū na ingechaūxū rū tagutāma inajacuax. Notürü ngēma na nūxū ixuxū i Tupanaārū ore rū wūxi i ngunexūgu tá inajacuax. Rū ngēma tama nūxū icuáxū i nagawa na idexaxū, rū tá ta inajacuax. Rū ngēma nhuxma nūxū icuáxū rū wūxi i ngunexūgu rū marū taxuwatāma tūxū name. ⁹Erū ngēma tórū cuax i nhuxma tūxū ngēxmaxū, rū Tupanapexewa rū naxíra. Rū ngēxumarūū ta i ngēma norū orexū na ixuxū, rū wūxi i íramarexūtama nixī. ¹⁰Rū guxūma i ngēma rū tá inajarūxo i ngēxguma Tupanapexewa ingugūgu rū nūma guxūxūma tūxū nacuaxēēgu. ¹¹Jexguma chabuxgu ga chamax, rū wūxi ga buxūruū chidexa, rū buxū nagu rūxīnūxūgu charūxīnū, rū tama meā chauāēxū chacuax. Notürü jexguma marū chajaxgu, rū nūxū charūxo ga

guxŭma ga jema chorŭ bucŭma. ¹²Rŭ ngĕma nhŭxma nŭxŭ idauxŭ i Tupanachiga, rŭ nhama wŭxi ja worua ja ŭxachametŭxewa jigŭ idauxŭrŭŭ nixŭ na taxçax naxĕxŭ. Notŭrŭ jixçŭra rŭ tá aixcuma meã nŭxŭxŭchi tadau ja Tupana. Rŭ nhŭxma rŭ íraruwatama nŭxŭ chacuax i Tupanachiga. Notŭrŭ wŭxi i ngunexŭgu rŭ tá meã nŭxŭ chacuax i guxŭma i nachiga, ngĕma na Tupana meãma choxŭ cuáxŭrŭŭ. ¹³Rŭ nhŭxma rŭ nangĕxma i tamaĕxpŭx i nacŭmagŭ i guxŭgucax ixŭxŭ. Rŭ ngĕma nixŭ:

1 Rŭ Tupanaãxŭ tajaxŭgŭ

2 Rŭ nŭxŭ ítananguxĕĕ na nataeguxŭ ja Cristu

3 Rŭ nŭxŭ tacuax na tamŭcŭxŭ ingechaŭxŭ.

Notŭrŭ ngĕma tamaĕxpŭxtanŭwa rŭ ngĕma guxŭãrŭ jexera ixŭxŭ, rŭ ngĕma nixŭ na tamŭcŭxŭ ingechaŭxŭ.

Ngĕma tama nŭxŭ icuáxŭ i nagawa na idexaxŭchiga

14 ¹Rŭ naxçax pedax na pemŭcŭgŭxŭ pengechaŭxŭ! Rŭ ngĕxgumarŭŭ ta name nixŭ i naxçax ípeca na Tupana pexna naxãxŭçax i ngĕma togŭ i nacŭmagŭ i Naãĕ i Ŭnĕxŭwa ne ĭxŭ. ²Rŭ ngĕma nacŭma i jexeraãcŭ naxçax ípeçaxŭ nixŭ na meãma nŭxŭ peixuxŭ i norŭ ore! ³Jŭxema duŭxĕ ja tama nŭxŭ tacuáxŭ i nagawa idexaxe, rŭ Tupanamaã nixŭ i tidexaxŭ rŭ tama i duŭxŭgŭmaã, erŭ taxúema nŭxŭ tacuax na nhuxŭ nhaxŭchiga jŭixŭ. Rŭ Tupanaãĕ i Ŭnĕxŭ nixŭ i tŭxŭ idexaxĕxŭ, notŭrŭ ngĕma ore i nŭxŭ tixuxŭ rŭ ĕxŭguxŭ

nixŭ. ³Notŭrŭ jŭxema nŭxŭ ixuxe i Tupanaãrŭ ore rŭ ngĕmaãcŭ nŭxŭ tarŭngŭxĕĕ i duŭxŭgŭ na jexeraãcŭ meã jaxŭgŭãxŭçax rŭ nŭxŭ nangŭçhaŭxŭçax i ngĕma ore rŭ naporaexŭçax i ngĕxguma guxchaxŭ nŭxŭ ŭpetŭgu. ⁴Rŭ jŭxema duŭxĕ ja tama nŭxŭ tacuáxŭ i nagawa idexaxe, rŭ tŭmacaxtama nixŭ i ngĕma, na jexeraãcŭ meã Tupanaãxŭ tajaxŭxŭçax. Notŭrŭ jŭxema nŭxŭ ixuxe i Tupanaãrŭ ore, rŭ nŭxŭ tixu na jexeraãcŭ Tupanaãxŭ jaxŭgŭãxŭçax i guxŭma i jaxŭgŭxŭ. ⁵Chama chierŭ chanaxwaxe na guxãma i pema rŭ ngĕma tama nŭxŭ pecuáxŭ i nagawa na peidexagŭxŭ. Notŭrŭ jexeraãcŭ chanaxwaxe na duŭxŭgŭmaã nŭxŭ peixuxŭ i Tupanaãrŭ ore. Erŭ ngĕma to i nagawa na peidexagŭxŭãrŭ jexera narŭmemaĕ na togŭmaã nŭxŭ peixuxŭ i Tupanaãrŭ ore. Notŭrŭ ngĕma to i nagawa na idexaxŭ, rŭ name ega ngĕma jaxŭgŭxŭmaã nŭxŭ ixuxgu na țacŭchiga jŭixŭ i ngĕma dexa, na nŭmagŭ rŭ ta jexeraãcŭ meã Tupanaãxŭ jaxŭgŭãxŭçax. ⁶Rŭ ngĕmacax, Pa Chaueneĕgŭx, rŭ ngĕxguma chi pexŭtawa chaxŭxgu, rŭ chi to i nagawa chidexagu, țrŭ țaciwa chi pexŭ namexŭ i ngĕma? Notŭrŭ ngĕxguma chi pemaã nŭxŭ chixuxgu i ngĕma Tupana tŭxŭ nŭxŭ cuaxĕĕxŭ, rŭ ĕna ngĕma chamatama nŭxŭ chacuáxŭ na aixcuma jŭixŭ, rŭ ĕna ngĕma ĕxŭguxŭ i nhŭxma Tupana tŭxŭ nŭxŭ cuaxĕĕxŭ, rŭ ĕna țacŭ rŭ to i nguxĕĕtae i Tupanachiga, rŭ ngĕma waxi nixŭ i pexŭ mexŭ. ⁷Rŭ dŭcax i ngĕma paxetarŭŭ i woweru rŭ ĕna arpa! Rŭ ngĕxguma tau chima texĕ meã napaŭxgu, rŭ tau chima nŭxŭ

tacuax na tacügu tanapaxüxü. ⁸Rü ngëma churaragü, rü ngëxguma norü uwanügümaã nügü nadaixchaügu, çrü nhuxäcü tá nügü namexëë na nügü naðaixüçax ega tama meã nangógagu ja jima corneta ja ðaixçax nagu jacuexüne? ⁹Rü ngëxgumarüü ta pemaã nangupetü. Rü ngëxguma chi perü conümaã nüxü peixuxgu i dexa i taxúema nüxü cuáxü, çrü nhuxäcü tá nüxü tacuax na nhuxü nhaxüchiga jïixü i ngëma nüxü peixuxü? Rü nhama ngürüanewa peidexagixürüü tá peixigü. ¹⁰Rü aixcuma nixi i namuxü i nagagü i nhama i naãnewa. Rü guxüma i ngëma nagagü rü name naxçax i ngëma duüxügü i nawa idexagixü. ¹¹Notürü ngëxguma chi tama nüxü chacuaxgu i ngëma naga i to i duüxü chamaã nawa idexaxü, rü ngëma duüxüçax rü nhama to i nachüãnecüãxrüü chixi, rü chauççax rü nhama to i nachüãnecüãx i duüxürüü nixi i númax. ¹²Chama nüxü chacuax rü pema rü pexü nangüchaü na pexü nangëxmaxü i ngëma nacümagü i Tupanaãe i Üünexü tüxna äxü. Notürü name nixi i naxçax pedau na guxüärü jexera pexna naxãaxü i ngëma nacümagü i namaã nüxü perüngüxëëxü i guxüma i jaxögüxü na jexeraãcü meã Tupanaãxü jaxögüãxüçax. ¹³Rü ngëmacax jïxema duüxë ja taxúema nüxü cuáxü i nagawa idexaxe, rü name nixi i Tupanana naxçax taca na tüxna naxãaxüçax i cuax na togümaã nüxü tixuxüçax na nhuxü nhaxüchiga jïixü i ngëma nüxü tixuxü. ¹⁴Rü ngëxguma chi taxúema nüxü cuáxü i nagawa chajumuxëgu, rü chauãe nixi i ngëma jumüxëxü. Notürü chatatama rü

taxuüma chacuax na tacüchiga jïixü i ngëma. ¹⁵çRü tacü tá chaxü i nhuxmax? Rü marü name nixi ega taxúema nüxü cuáxü i nagawa chajumuxëgu, notürü chanaxwaxe i guxãma nüxü cuáxü i nagawa rü ta chajumuxë. Rü marü name nixi ega taxúema nüxü cuáxü i nagawa chawijaegu, notürü chanaxwaxe i guxãma nüxü cuáxü i nagawa rü ta chawijae. ¹⁶Erü ngëxguma chi taxúema nüxü cuáxü i nagawa Tupanaxü cuicuaxüügu, rü jïxema duüxëgü ja ngëma irüxïnüëxë, rü taxucürüwa cumaã wüxigu Tupanaxü ticuaxüügü, erü tama nüxü tacuax na nhuxü nhaxüchiga jïixü i ngëma nüxü cuixuxü. ¹⁷Rü woo ngëma curü jumuxë rü namexëchixgu, notürü jïxema duüxëgü ja ngëma irüxïnüëxë rü taxuüma i mexü nawa tajaxu ega to i nagawa cuidexagu. ¹⁸Tupanana moxë chaxã, erü perü jexera taxúema nüxü cuáxü i nagawa chidexa. ¹⁹Notürü woo muxüma i ore i taxúema nüxü cuáxü i nagawa na chidexaxü, notürü ngëma jaxögüxüärü ngutaquexëgüwa rü chauççax rü narümemaë chi nixi ega woo noxre i ore i meãma nüxü icuáxüwa namaã nüxü chixuxgu i Tupanaärü ore na ngëmaãcü ngëmamaã meã chanangüxëëxüçax. ²⁰Pa Chaueneëgüx, tama name nixi i buxügürüü peixigü i ngëma nagu perüxïnüëxüwa. Rü name nixi i wüxi i buxü i ngëxwacax íraxürüü tama chixexü pexü, notürü ngëma nagu perüxïnüëxüwa rü penaxwaxe i duüxü i marü jaxürüü nagu perüxïnüë. ²¹Tupanaärü ore ga nuxcümamaxüü ga norü orearü urüü ümatüxü rü nhanagürü:

“Rü nuã tá chanamugü i to i nachiũãneçũăx i duĩxũgü na to i nagawa jadexagũxũcax namaã i nhaã Judéugü i tama jaxôgũxũ. Notürü woo ngẽmaãcü chanaxũxgu, rü tãũxũtãma chauga naxĩnüë i ngẽma Judéugü i tama irũxĩnüëchaũxũ”, nhanagürü ga Tupana. ²²Rü ngẽmacax ngẽma na taxúema nüxũ cuáxũ i nagawa idexaxũ, rü wüxi i cuãxruũ nixĩ naxcax i ngẽma duĩxũgü i tama irũxĩnüëchaũxũ. Rü tama duĩxũgü i marü jaxôgũxũcax nixĩ i ngẽma. Notürü ngẽma Tupanaãrü orexũ na ixuxũ, rü duĩxũgü i marü jaxôgũxũcax nixĩ na jexeraãcü meã Tupanaãxũ jaxôgũãxũcax. Rü tama duĩxũgü i tama irũxĩnüëchaũxũcax nixĩ i ngẽma. ²³Rü ngẽxguma chi pema i jaxôgũxe pengutaquexegügu, rü guxã chima to i nagawa peidexagügu, ¿rü nhuxũ nhaxũ tá ega petanügu naxücuxgu i wüxi i duĩxũ i ngẽma ijarũxĩnüxũ rü exna wüxi i duĩxũ i taũta jaxôxũ? ¿Taux exna i nagu tá naxĩnüxũ na pexãũãëgũxũ i pemax? ²⁴Notürü ngẽxguma chi guxãma i pema nüxũ peixuxgu i Tupanaãrü ore, rü chi petanügu naxücuxgu i wüxi i duĩxũ i tama jaxôxũ rü exna wüxi i duĩxũ i ngẽma ijarũxĩnüxũ, rü tá nüxũ naxĩnü i ngẽma Tupanaãrü ore i nüxũ peixuxũ. Rü ngẽmaãcü tá nüxũ nacuaç na nüma rü wüxi i pecaduáxũ na jĩixũ. Rü nügügu tátama ínãrũxĩnü i ngẽxguma nüxũ naxĩnügu i ngẽma nüxũ peixugüexũ. ²⁵Rü ngẽma chixexũ i nüxĩcatama nüxũ nacuaçũ rü tá naxcax

ínicuãç. Rü nüma rü ngẽxma tá nacaxãpũxü, rü tá Tupanaxũ nicuaçtũü. Rü tá nüxũ nixu na aixcuma Tupana petanüwa nangẽxmaxũ.

Guxũma i țacü i ngutaquexewa pexũxũ, rü name nixĩ i meã peãëta ipexũãcüma penaxü

²⁶Dücax, Pa Chaueneëgũx, nhuxma tá pemaã nüxũ chixu na nhuxãcü tá penaxũxũ ega ngẽxguma pengutaquexegügu. Rü nhuxre i pema rü marü name na Tupanaãrü wijaegu pewijaegũxũ, rü togue rü tanguxëëtaegũxũ, rü togue rü nüxũ tixuxũ i ngẽma ore i Tupana tũxũ nüxũ cuãxëëxũ, rü togue rü nawa tidexagũxũ i naga i tama nüxũ tacuaçgũxũ, rü togue rü tanangoxëëgũxũ i ngẽma dexa i to i nagawa nüxũ jaxugũxũ. Notürü guxũma i ngẽma rü tanaxwaxe i jaxôgũxũãrü ngũxëëcax na jĩixũ, na jexeraãcü jaxôgũãxũcax rü meã Tupanacax namaxëxũcax. ²⁷Rü ngẽxguma to i naga i pema tama nüxũ pecuaçũwa peidexagügu, rü name nixĩ i taxre rü exna tamaëxpũxicatama tidexagü. Rü tanaxwaxe i wüxiexira tidexa i noxri rü jixcama ja togue. Rü ngẽxguma chi texé to i nagawa idexagu, rü name nixĩ na tangẽxmaxũ ja wüxie ja nüxũ ixuchigũxe na țacüchiga jĩixũ i ngẽma ore i to i nagawa nüxũ jaxuxũ. ²⁸Notürü ngẽxguma chi tatauxgu na texé nüxũ ixuchigũxũ na țacüchiga jĩixũ i ngẽma ore i to i nagawa nüxũ jaxuxũ, rü narümemã nixĩ na noxtacüma tama to i nagawa peidexagü i perü ngutaquexewa. Rü narümemã i wüxichigü tũxica Tupanamaãxĩcatama

bexma tidexagü. ²⁹Rü ngëxgumarüü ta ngëxguma pengutaquexegügu, rü name nixí i taxre rü exna tamaëxpüxicatama nüxü tixu i Tupanaärü ore. Rü ngëma togü i ngutaquexetanüxü rü name nixí na meã nangugüüãxü i ngëma ore.

³⁰Notürü ngëxguma chi íjadexajane i wüxi i duüxü, rü Tupana tümamaã idexagu ja togue ja ngëma rütoxe, rü name nixí na ijanachianexü i ngëma nüxíra idexaxü na tidexaxüçax ja jíxema duüxë ja Tupana tümamaã idexaxe.

³¹Rü ngëmaãcü guxãma i pema na Tupana pemaã idexaxü, rü name nixí i wüxichigü ípenanguxëë na pewa nanguxü na peidexagüxü i Tupanaärü ore. Rü ngëmaãcü i ngëma togü i ngutaquexetanüxügü rü tá Tupanachiga meã nangúe rü tá nataãëgü. ³²Rü ngëmaãcü tanaxwaxe i meãma tümamaã itacuax ja wüxichigü ja jíxema Tupanaärü orexü ixuxe. ³³⁻³⁴Erü perü ngutaquexegüwa rü Tupana nanaxwaxe na meã penaxüxü i guxüma, rü tama nanaxwaxe na ngëma pexãügatanüxü rü pegü ípetüexëëxü. Rü guxüma i togü i jaxögüxüärü ngutaquexegüwa rü marü nüxü najapue na tama jadexagüxü i ngexügü. Rü name nixí i pema rü ta ngëmaãcü penaxü, erü nachüxu na jadexagüxü i ngexügü i ngutaquexegüwa. Rü name nixí na jatügüga naxínüëxü i ngexügü, ngëma Tupanaärü ore tüxü muxüüü.

³⁵Rü ngëxguma chi ñacüxü nacuáxchaügu i wüxi i ngexü, rü name nixí i nachüüwatama natena naca i nachiga i ngëma. Erü wüxi i ãne nixí ega ngutaquexewa jadexagu i wüxi i ngexü. ³⁶Pa Corítüucüãxgüx, name nixí

na nüxna pecuaxächieü na tama pewaxira ne naxüxü i Tupanaärü ore. Rü tama pexicatama nixí i penajauxgüxü i ngëma. ³⁷Rü ngëxguma chi texé tügügu rüxínügu na Tupanaärü orearü uruü tíxü rü exna tügügu tarüxínügu na Tupanaãë i Üünexü tüxna naxãxü i ñacü rü cuax, rü name nixí i nüxna tacuaxächie na tórü Coriarü ore jíxü i nhaã ore i pexçax chaxümatüxü.

³⁸Notürü ngëxguma chi texé tama nüxü cuáxchaügu i ngëma pemaã nüxü chixuxü, rü name nixí i tama tüxü pecuáxchaü. ³⁹Rü ngëmacax, Pa Chaueneëgüx, rü Tupanana naxçax peca i cuax na meãma nüxü peixuxüçax i norü ore! Rü tama penachüxu na to i nagawa jadexagüxü i duüxügü! ⁴⁰Rü perü ngutaquexegüwa, rü name nixí na meã penaxüxü i guxüma. Rü tama name i ngëma pexãügatanü rü pegü ípetüexëë.

Cristu na juwa írudaxüchiga

15 ¹Rü nhuxmax, Pa Chaueneëgüx, rü chanaxwaxe i nüxna pecuaxächie i ngëma Tupanaärü ore i tüxü maxëxëëxü ga pemaã nüxü chixuxü. Rü jematama ore nixí ga pema pejauxgüxü. Rü nhuxma rü ngëmatama oregagu nixí i meã pejaxögüxü. ²Rü ngëma oregagu nixí i pexü nangëxmaxü i maxü i taguma gúxü, ega aixcuma guxüguma pejaxögüamagu. Notürü ngëxguma tama guxüguma pejaxögügu, rü notüçaxmamare nixí i ngëma perü ö. ³Rü noxri pexü changúexëë ga jema nguxëëtae ga chamatama togü ga chamüçügüxütawa chajaxuxü. Rü pexü changúexëë na Cristu rü tórü pecaduçax

najuxũ, ngẽma Tupanaãrũ ore i ũmatũxũwa nũxũ ixuxũrũũ. ⁴Rũ jexgumarũũ ta pexũ changũexẽ na nhuxãcü inatãxgũãxũ, rũ nhuxãcü norũ tamaẽxpũx ga ngunexũgu rũ wena na namaxũxũ, ngẽma Tupanaãrũ ore i ũmatũxũ nũxũ ixuxũrũũ. ⁵Rũ jexgumarũũ ta pexũ changũexẽ ga nhuxãcü Pedrucãx na nangóxũ ga Cristu, rũ nhuxãcü jixcũra rũ norũ ngũexũgũ ga jamugũxũcãx na nangóxũ. ⁶Rũ jemawena ga Cristu rũ noxtacũma 500 arũ jexera ga jaxõgũxũcãx nangõx. Rũ muxũma i ngẽma duũxũgũ rũ nhuxma rũ ta namaxẽ, notũrũ nũmaxũ rũ marũ najue. ⁷Rũ jemawena rũ Tiagucãx nangõx, rũ jixcama guxũma ga jema togũ ga ngũexũgũ ga jamugũxũcãx nangõx. ⁸Rũ dũxwa chawa inajacuãx ga chauxcãx rũ ta na nangóxũ, woo ngũrũãchimare nixĩ ga jema, ngẽxgumarũũ i wũxi i buxũ i tautama norũ ngunexũwa nangujane buxũrũũ. ⁹Rũ chama rũ guxũma i ngẽma togũ i Tupana imugũxũtũũwa chaxũ. Rũ tau chima name na Tupana imuxũmaã choxũ naxugũxũ i duũxũgũ, jerũ nawe chingẽchigũ ga Tupanaãrũ duũxũgũ rũ poraãcü chixexũ namaã chaxũ. ¹⁰Notũrũ ga Tupana rũ chamaã namecũma, rũ ngẽmacãx i nhuxma rũ choxũ pedau na ãcãcü chiĩxũ rũ nhuxãcü na chiĩxũ. Rũ jema chamaã na namecũmaxũ rũ tama notũcãxma nixĩ. Jerũ chama rũ guxũ ga togũ ga jamugũxũãrũ jexera chanaxũ ga Tupanaãrũ puracũ. Notũrũ tama chamatama nixĩ ga chanaxũxũ ga jema puracũ, notũrũ Tupana ga chamaã mecũmacũ rũ chamaã puracũcü nixĩ ga naxũcü ga jema puracũ na nũxũ

chixuxũcãx ga norũ ore. ¹¹Notũrũ i nhuxma rũ nũẽtama nixĩ ega woo chama chixĩgu rũ exna togũ jixĩgu ga pemaã nũxũ ixuxũ ga jema ore. Jerũ jema ore ga pemaã nũxũ tixuxũ, rũ Tupanaãrũ ore i tũxũ maxẽxẽxũ nixĩ, rũ jema nixĩ ga peixõgũxũ.

**Nhuxãcü wena tá namaxẽ i
duũxũgũ i juexũ**

¹²Marũ pemaã nũxũ tixu na Cristu rũ juwa ínadxũ. ĸRũ tũxcũũ nhuxre i pema rũ nhaperũgũgũ:

“Juexũ rũ tagutãma wena namaxẽ”, nhaperũgũgũ? ¹³Rũ ngẽxguma chi ngẽma juexũ rũ tagu chima wena namaxẽgu rũ ga Cristu rũ chi ta tau chima wena namaxũ. ¹⁴Rũ jexguma chi Cristu tama wena maxũgu, rũ ngẽma ore i nũxũ tixuxũ i nachiga rũ taxuwa chima name, rũ notũcãxmamare chi nixĩ i perũ õ. ¹⁵Rũ ngẽxguma chi ngẽmaãcü jixĩgu, rũ toma rũ Tupanaãrũ orearũ uruũgũ i doratãxgũxũ chi tixĩgũ. Erũ nũxũ tixu na Tupana Cristuxũ wena maxẽxũ. Rũ ngẽxguma chi tama aixcuma jixĩgu na wena namaxẽxũ i juexũ, rũ chi wũxi i doramare nixĩ na Tupana Cristuxũ wena maxẽxũ. ¹⁶Rũ ngẽxguma chi ngẽma juexũ rũ tagu chima wena namaxẽgu, rũ ga Cristu rũ chi ta tau chima wena namaxũ. ¹⁷Rũ jexguma chi Cristu tama wena maxũgu, rũ notũcãxmamare chi nixĩ i pejaxõgũxũ, rũ chi nhuxma rũ ta perũ pecadugagu ipejarũtauxe. ¹⁸Rũ chi ngẽmaãcü jixĩgu rũ ngẽma duũxũgũ i Cristuaxũ jaxõgũxũ i marũ juexũ, rũ chi ta tau chima nũxũ nangẽxma i maxũ i taguma

gúxũ. ¹⁹Rũ ngẽxguma chi nhama i maxũçaxicatama jixĩgu na Cristuaxũ jaxõgũxũ, rũ chi guxũ i togũ i duũxũgũarũ jexera tangechaũtũmũũgũ. ²⁰Notũrũ aixcumaxũchi nixĩ ga Cristu ga juwa na ínadxũ. Rũ natanũwa i guxũma i ngẽma juexũ i jixcũra tá írũdagũxũ, rũ Cristu nixĩ ga namaã inaxũgũcũ na ínadxũ, jerũ nũma nixĩ ga nũxĩra wena namaxũxũ. ²¹Rũ jexgumarũũ wũxi ga jatũgagu na najuexũ ga duũxũgũ, rũ ngẽxgumarũũ tá ta nixĩ na wũxi i jatũgagu wena namaxẽxũ i ngẽma marũ juexũ. ²²Rũ ngẽxgumarũũ Adáũgagu guxãma na juexũ, rũ ngẽxgumarũũ tá ta nixĩ na Cristugagu namaxẽxũ i guxũma i duũxũgũ i nũxũ jaxõgũxũ. ²³Notũrũ wũxichigũ tá tũmawa nangu na wena tamaxũxũ. Rũ Cristu nixĩ ga nũxĩra maxũcũ. Rũ ngẽxguma wena nũma naxũxgu i nũmax, rũ ngẽxguma tá nixĩ i wena namaxẽxũ i ngẽma duũxũgũ i noxřũ ixĩgũxũ. ²⁴Rũ ngẽmawena tá nixĩ i nagũxũ i naãne. Rũ ngẽxguma tá nixĩ ja Cristu i nũxũ naporamaẽxũ i guxũma i norũ uwanũgũ. Rũ ngẽxguma tá nixĩ i Nanatũ ja Tupanana naxããxũ i guxũma na nũma namaã inacuáxũçax. ²⁵Erũ nũma ja Cristu rũ ãẽxgacũ tá nixĩ nhũxmatáta nũxũ naporamaẽ i guxũma i norũ uwanũgũ. ²⁶Rũ ngẽma nawa ijacuáxũ i norũ uwanũ i tá nũxũ naporamaẽxũ, rũ ju nixĩ. ²⁷Jerũ Tupana rũ marũ Cristumẽxẽwa nanajexmagũxẽẽ ga guxũma. Notũrũ woo Tupanaãrũ ore nũxũ ixuxgu na Cristumẽxẽwa nangẽxmagũxũ i guxũma, notũrũ nũmatama ja Tupana rũ tama Cristumẽxẽwa nangẽxma. Jerũ

nũma ga Tupana nixĩ ga Cristumẽxẽwa najexmagũxẽẽãxũ ga guxũma. ²⁸Rũ ngẽxguma guxũma Cristumẽxẽwa ngẽxmagũgu, rũ nhũxmachĩ nũmatama ja Cristu ja Tupana Nane rũ tá Nanatũmẽxẽwa nũgũ nangẽxmaxẽẽ. Jerũ nũma ga Tupana nixĩ ga noxřĩ Cristumẽxẽwa najexmagũxẽẽãxũ ga guxũma. Rũ ngẽmaãcũ ja Tupana rũ guxũãrũ ãẽxgacũ tá nixĩ. ²⁹Rũ nangẽxma i nhuxre i duũxũgũ i petanũwa i Tupanaẽgagu juexũchicũũ fbaiũxũ. ¿Rũ tũxciũũ ngẽma naxũgũ? Rũ ngẽxguma chi tama wena namaxẽgu i duũxũgũ i juexũ, ¿rũ tũxciũũ ngẽma juexũchicũũ ínabaiũ? ³⁰¿Rũ tũxciũũ i toma rũ guxũguma ãũcũmaxũwa tangẽxmagũ? ³¹Pemaã nũxũ chixu, Pa Chaueneẽgũx, rũ guxũ i ngunexũgu rũ ãũcũmaxũwa changẽxma, rũ tama nũxũ chachuax i tacũ rũ ngunexũgu Tupanaãrũ oregagu tá na chajuxũ. Rũ ngẽma rũ aixcumaxũchi nixĩ, ngẽxgumarũũ na aixcuma jĩixũ na choxũ nangẽxmaxũ i wũxi i taãe i taxũ i nhũxma na tórũ Cori ja Ngechuchu ja Cristuaxũ pejaxõgũxũ. ³²Chama rũ nuã Epẽchiuwa rũ Tupanaãrũ orechigagu chorũ uwanũmaã poraãcũ togũ tachoxũgagũ. Rũ nhama naẽxũ i idũraexũmaã togũ tađaixũrũũ tixĩgũ. ¿Notũrũ tacũwa choxũ namexũ ga jema ega chorũ maxũ i nhama i naãnewa choxũ ngẽxmaxũçaxicatama jixĩgu? Rũ ngẽxguma chi aixcuma jixĩgu na tama wena namaxẽxũ i juexũ, rũ marũ name i nhatarũgũgũ:

“¿Ngĩxã tachibũe rũ taxaxegũ, erũ paxa tá tajue!” nhatarũgũgũ. ³³¿Notũrũ táũxũtãma nawe perũxĩ i ngẽma

duūxūgū i ngēmaācū chixri idexagūxū!
Erū aixcuma nixī i ngēma ore i nhaxū:

“Rū texé ja chixexū i duūxūmaā
āmūcūxe, rū tūxū inajanaxoxēē i
tūmacūmagū i mexū”, nhaxū. ³⁴Rū
name nixī i meā pegūāēgu perūxīnūē rū
nūxū perūxoe i ngēma perū chixexūgū.
Rū wūxi i perū āne nixī na pemaā nūxū
chixuxū rū nhuxre i pema rū tama
aixcuma Cristuarū duūxūgū peixīgūxū
rū tama aixcuma Tupanaxū
pecuaxgūxū.

Nhuxācū wena namaxē i juexūgū

³⁵Notūrū bexmana wūxie tá pexna
taca rū nhatarūgū pexū:

“¿Nhuxācū tá wena namaxēxū i
juexū? ¿Rū nanhuxraūxū i naxūnemaā
tá inadagūxū?” nhatarūgū pexū. ³⁶Rū
pemaā nūxū chixu rū wūxi i ngēāēxū
nixī na ngēmaācū pexna taçaxū. Erū
ngēxguma wūxi ja nanetūchire itoxgu,
rū jima nanetūchire rū naju na
naxūxūcax i ngēma nanetū. ³⁷Rū ngēma
waixūmūgu itoxū, rū wūxi ja triguchire
rū exna tacū rū to i nanetūchire nixī. Rū
tama nane i rūxūxū nixī i itoxū. ³⁸Rū
ngēxguma marū ipenatoxguwena, rū
Tupana nanaxūxēē ja jima naxchire na
nūma nanaxwaxexūācūma jīxūcax i
ngēma nanetū. ³⁹Rū tama guxū i
naxūnegū rū nawūxigu. Rū duūxēxūne
rū nanatoraxū, rū naēxūgūxūne rū to
nixī, rū werīgūxūne rū to nixī, rū
choxnīgūxūne rū to nixī. ⁴⁰Rū
ngēxgumarūū ta nangēxma i naxūnegū i
daxūgūxū i naānecūāx, rū nangēxma i
naxūnegū i nhama i naānecūāx. Rū
ngēma daxūgūxū i naānecūāx i
naxūnegū rū nūxū nangēxma i

noxrūtama mexū, rū ngēma nhama i
naānecūāx i naxūnegū rū ta nūxū
nangēxma i noxrūtama mexū. Notūrū
tama nawūxigu i ngēma norū mewa.
⁴¹Rū ūaxcūarū jauracūū rū to nixī, rū
tawemacūarū jauracūū rū to nixī. Rū
woramacurīgūarū jauracūū rū to nixī.
Rū nūgūtanūwatama ja woramacurīgū,
rū tama nawūxigu i norū jauracūū. ⁴²Rū
ngēxgumarūū tá ta naxūpetū namaā i
naxūnegū i ngēma duūxūgū i juexū. Erū
ngēma naxūne i noxri nūxū ngēxmaxū
rū ijarūxoxwaxexū nixī. Notūrū ngēma
naxūne i tá nūxū ngēxmaxū i ngēxguma
wena namaxēgu, rū ngēma rū tagutāma
inajarūxo. ⁴³Rū ngēma naxūne i juxū rū
taxuwama name i ngēxguma inataxgu.
Notūrū ngēxguma wena namaxūgu rū tá
namexēchi. Rū ngēma naxūne i nhuxma
turaxū rū ngēxguma wena namaxūgu rū
tá naporā. ⁴⁴Rū itanatax i ngēma
naxūne i nhama i naānecūāx ixīxū.
Notūrū ngēxguma inadaxgu, rū
daxūcūāx i naxūne tá nixī. Rū nhuxma
na nangēxmaxū i naxūne i nhama i
naānecūāx rū ngēmawa nūxū tacuax na
nangēxmaxū ta i naxūne i daxūcūāx.
⁴⁵Tupanaārū ore i ūmatūxūwa rū
nhanagūrū:

“Guma nūxīraūcū ga jatū ga Adāū
rū nūxū najexma ga nhama ga
naānecūāx ga naxūne ga
paxāachi maxūxū”,

nhanagūrū. Notūrū ja Cristu rū
daxūcūāx nixī. Rū nūma nixī i tūxna
naxāxū i maxū i taguma gūxū. ⁴⁶Noxri
rū tūxū nangēxma i nhama i naānecūāx
i taxūne. Notūrū jixcama rū Tupana tá
tūxna nanaxā i to i taxūne i daxūcūāx
ixīxū. ⁴⁷Guma nūxīraūcū ga jatū ga

waixŭmŭwa ũcŭ, rŭ nhama ga naānecŭāx nixĭ. Notŭrŭ tŭrŭ Cori ja Cristu rŭ dauxŭguxŭ i naānecŭāx nixĭ. ⁴⁸Rŭ ngēma taxŭnegŭ i nhama i naānewa tŭxŭ ngēxmaxŭ, rŭ guma Adāŭxŭne ga waixŭmŭwa ũcŭrŭŭ nixĭgŭ. Notŭrŭ ngēma naxŭnegŭ i dauxŭwa nŭxŭ ngēxmaxŭ i duŭxŭgŭ, rŭ Cristuxŭnerŭŭ nixĭgŭ. ⁴⁹Rŭ nhgexgumarŭŭ na Adāŭ ga waixŭmŭwa ũcŭrŭŭ na jĭxŭ i taxŭne, rŭ ngēxgumarŭŭ tŭ ta Cristu ja dauxŭwa ngēxmacŭrŭŭ nixĭ i taxŭne i jixcŭra. ⁵⁰Rŭ dŭcax, Pa Chaueneēgŭx, pemaā nŭxŭ chixu rŭ nhaā taxŭne i namachinaxçax rŭ naxchinaxānaxçax, rŭ taxucŭrŭwa Tupana āēxgacŭ ĩjĭxŭwa nangu. Erŭ ngēma ĩjarŭxoxŭ, rŭ taxucŭrŭwama Tupanaxŭtawā i ngextā taxuŭma ĩjarŭxoxŭwa nixŭcŭ. ⁵¹Notŭrŭ chanaxwaxe na nŭxŭ pecuāxŭ i wŭxi i ore i ēxŭguxŭ ga noxri Tupanaxĭcatama nŭxŭ cuāxŭ. Rŭ dŭcax, tāxŭtāma guxā tajue, notŭrŭ guxāxŭne rŭ tŭ naxŭchicŭŭ. ⁵²Rŭ ngŭrŭāchimare wŭxi i peāxētŭgu tŭ nixĭ i ngēma na naxŭchicŭŭxŭ i taxŭne i ngēxguma naāneārŭ guxgux naxāgagu ja corneta. Rŭ tŭ naxāga ja jima corneta, rŭ ngēxguma i ngēma duŭxŭgŭ i juexŭ rŭ tŭ ĩnarŭdagŭ na tagutāma wena najuexŭçax. Rŭ jixema na imaxēxŭ rŭ tŭ naxŭchicŭŭ i taxŭne. ⁵³Erŭ ngēma taxŭne i juxwaxexŭ rŭ woetama tama taixŭ rŭ tŭ naxŭchicŭŭ. Rŭ wŭxi i ngexwacaxŭxŭ i naxŭne i aixcuma taixŭ rŭ tagutāma juxŭ tŭ nixĭ. ⁵⁴Rŭ ngēxguma ngēmaācŭ naxŭchicŭŭgu i taxŭne i juxwaxexŭ, rŭ tŭxŭ nangēxmagu i taxŭne i ngexwacaxŭxŭ i

taguma juxŭ, rŭ ngēxguma tŭ nixĭ i janguxŭ i Tupanaārŭ ore i ũmatŭxŭ i nhaxŭ:

“Marŭ ĩnajarŭxo na najuexŭ i duŭxŭgŭ. Rŭ Tupana rŭ marŭ juxŭ narŭjexera. ⁵⁵Rŭ dŭcax, Pa Jux, ĩngēxŭ i curŭ pora i namaā toxŭ curŭjexeraxŭ? ĩRŭ ngēxŭ i ngēma cuxne i namaā toxŭ cuđaixŭ?”

nhanagŭrŭ i ngēma Tupanaārŭ ore. ⁵⁶Rŭ ngēma naxne i ju, rŭ pecadu nixĭ. Erŭ ngēma pecadu nixĭ i naporaxēēxŭ i ngēma ju na tŭxŭ nađaixŭçax. Rŭ ngēma mugŭ ga Muĭsé ũmatŭxŭ nixĭ i naporaxēēxŭ i pecadu, erŭ woo namexgu i ngēma mugŭ, notŭrŭ taxucŭrŭwama texé aixcuma tajanguxēē. ⁵⁷Notŭrŭ name nixĭ i Tupanana moxē taxā jerŭ nŭma nanamu ga tŭrŭ Cori ja Ngechuchu ja Cristu na ngēma juxŭ tŭxŭ naporamaēēxŭçax. ⁵⁸Rŭ ngēmacax, Pa Chaueneēgŭ ja Pexŭ Changechaŭgŭxex, rŭ name nixĭ i meā pejaxŭgŭama rŭ taguma ĩpenataç i Tupanaārŭ ore. Rŭ name nixĭ i guxŭguma meā penaxŭ i tŭrŭ Coriarŭ puracŭ, erŭ pema nŭxŭ pecuax rŭ ngēma puracŭ i nŭxŭ pexŭxŭ, rŭ tama notŭçaxma nixĭ.

Diēru ga nutaquexecŭ naxçax ga jema togŭ ga jaxŭgŭxŭ

16 ¹Rŭ nhŭxma tŭ pemaā nŭxŭ chixu i nachĭga i ngēma diēru i penutaquexexŭ na namaā nŭxŭ perŭngŭxēēgŭxŭçax i taeneēgŭ i jaxŭgŭxŭ i Judéaanewa ngēxmagŭxŭ. Rŭ ngēma jaxŭgŭxŭ i Gárataanewa ngēxmagŭxŭ rŭ marŭ namaā nŭxŭ chixu

na nhuxācū tá ngīxū nanutaquexegūxū i ngēma dīeru. Rū chanaxwaxe i ngēxgumarūū ta penaxū i pemax. ²Rū guxcū i jūxūarū ngunexūgu rū name nixī i wūxichigū i pema rū ngīxū ípexūxūchi i ngēma dīeru i Tupanana ngīxū pexācū. Rū ngēxgumarūū na nhuxre i dīeru ngīxū pejaxuxū i perū puracūwa, rū name nixī i wūxichigū ngīxū ípexūxūchi i ngēma Tupanaārū íxīcū. Rū ngīmaā tá penguxū na tama ngēxguma ngēma changuxguama ngīxū na pedexūcax. ³Rū ngēxguma petanūwa changuxgu, rū tá chanaxūmatū i nhuxre i poperagū naxcax i taeneēgū i Jerucharēūwa ngēxmagūxū. Rū nhuxmachi ngēma poperamaā tá Jerucharēūwa chanamugū i ngēma duūxūgū i pema nūxū pexunetaxū na ngēma ngīxū nangegūxūcax i ngēma dīeru i taeneēgūcax ngīxū penutaquexegūcū. ⁴Rū ngēxguma chi choxū natauxchagu na ngēma Jerucharēūwa chaxūxū, rū chama rū tá ta ngēma chaxū, rū nūmagū rū tá wūxigu chamaā ngēma naxī.

**Pauru nagu narūxīnū na
Corítūwa naxūxū**

⁵Chama rū Machedóniāñewa tá chaxūpetū na íchajadauxūcax i taeneēgū i ngēma ngēxmagūxū. Rū ngēmawena rū tá petanūwa changu na pexū íchajadauxūcax. ⁶Rū ngūrūāchi tá nhuxre i ngunexūgū ngēxma petanūgu charūxāūx, rū bexmana ngūrūāchi ngēma petanūwa tá chanangupetūxēē ja mucū. Rū ngēxguma rū tá pexū natauxcha na choxū perūngūxēēgūxū na ngēma íchaxūxchaūxūwa chaxūxūcax.

⁷Erū tama chanaxwaxe i paxaāchimarē pexū chadau. Notūrū chanaxwaxe i poraācūxūra petanūgu charūxāūx ega nanaxwaxegu ja tórū Cori. ⁸Notūrū nuā Epēchiuarū íānēwa tá changēxma nhuxmatáta Pētecóstearū ngunexūwa nangu. ⁹Erū nuā rū tórū Cori poraācū choxū nanatauxchaxēē na nūxū chapuracūxūcax rū nūxū jaxōgūāxūcax i muxūma i duūxūgū woo namu i ngēma tama naxwaxegūxū na nuā chapuracūxū. ¹⁰Rū ngēxguma chi Timúteu petanūwa nguxgu, rū chanaxwaxe i meāma penajaxu na petanūwa nataāēxūcax. Erū nūma rū ta chauxrūū tórū Coriarū puracūwa napuracū. ¹¹Rū ngēmacax tama chanaxwaxe i texē petanūwa nūxū taxoe. Notūrū chanaxwaxe i nūxū perūngūxēē na taāēācūma nuā naxūxū na choxū íjadauxūcax. Erū poraācū íchananguxēē na nuā nanguxūcax namaā i ngēma togū i taeneēgū. ¹²Rū ngēma taeneē i Aporu rū poraācū nūxū chacaxū na petanūwa íjadauxūcax namaā i ngēma togū i taeneēgū. Notūrū tama ngēma naxūxchaū i nhuxmax. Notūrū ngēxguma naxāchicagu rū tá ngēma naxū.

**Pauru nūxū narūmoxē
ga jema jaxōgūxū**

¹³¡Rū pexuāēgū na taxūūma i chixexūgu pejixūcax! ¡Rū meāma pejaxōgūama woo ſacū pexū ūpetūgu! Rū name nixī i peporaēama rū taxūūcaxma pemuūē. ¹⁴Rū guxūma i ngēma pexūxū, rū name nixī i pegū pengechaūgūācūma penaxū. ¹⁵Rū nhuxmax, Pa Chaueneēgūx, pema

nūxũ pecuax na Estéfananūxũgü
 jiĩxũ ga nūxĩra jaxōgūxũ ga
 Acajaanewa. Rū meāma nūxũ
 pecuaxgü na nhuxācū poraācū
 taeneēgü i jaxōgūxũ na
 nangūxēēgūxũ. ¹⁶Rū chanaxwaxe i
 naga pexĩnūē i ngēma duūxũgü i
 Estéfananūxũgürũ ixĩgūxũ. Rū
 ngēxgumarũ ta chanaxwaxe i naga
 pexĩnūē i guxũma i ngēma duūxũgü i
 nhaā Tanatũarũ puracũwa puracũxũ
 rü ngũxēētaegũxũ. ¹⁷⁻¹⁸Rū nhuxma na
 taxucũrũwama chauxũtawā
 pengēxmagũxũ, rü wũxi ga chorũ taāē
 nixĩ na nũma naxĩxũ ga taeneēgü ga
 Estéfana rü Fortunātu rü Acáicu. Rū
 jema taeneēgü ga nũma ixũ rü pexũ
 nixuchigagü rü jemaācũ choxũ
 nataāēxēēgü ga jema pexũ na
 nataāēxēēgüxũrũ. Rū tanaxwaxe i
 naga pexĩnūē rü nūxũ pengechaũ i
 ngēma duūxũgü i ngēmagũrũ ixĩgūxũ.
¹⁹Rū guxũma i taeneēgü i jaxōgūxũ i
 Áchiaaneārũ tãnegũwa ngēxmagũxũ,

rü moxē pexcax ngēma namugü. Rū
 Aquiru rü Prichira rü guxũma i ngēma
 jaxōgūxũ i Aquirupatawa
 ngutaquexegũxũ, rü moxē pexcax
 ngēma namugü naégagu ja tórũ Cori.
²⁰Rū guxũma i taeneēgü i nũma
 ngēxmagũxũ rü moxē pexcax ngēma
 namugü. Rū chanaxwaxe i wũxichigü i
 pema rü pegü pengechaũgũācũma
 pegü perũmoxēgü. ²¹Chama i Pauru rü
 chaḡmexmaātama pexcax
 chanaxũmatũ i nhaā chorũ moxē. ²²Rū
 ngēxguma chi texé tama tórũ Cori ja
 Ngechuchu ja Cristuxũ ngechaũgu, rü
 Tupana tá tũxũ napocu. Rū paxa tá
 ínangu ja tórũ Cori. ²³Rū chanaxwaxe
 i tórũ Cori ja Ngechuchu ja Cristu
 poraācũ pexũ narũngũxēē rü pemaā
 inarũxãũx. ²⁴Rū guxãma i pema, rü
 poraācũ pexũ changechaũācũma pexũ
 charũmoxē naégagu ja tórũ Cori ja
 Ngechuchu ja Cristu.

*Rü nuāma pexna,
 Pauru*